

DUCASËN DADA UAID

Mibi ismenuequin dada uaid Ducas nebi.

¹ Utsin-utsinquien ambi naidbëdtabi Esuquidistu chuibanquin dada uaid dadpen iquec.

² Aidon Esuquidistun tauain naidbëdtabi ambi naid utsitedi isted-istedquin chuibanquin chiac-paden dada uaidtedi nec.

³ Esuquidistu chuibanquin dada uaid isban-quimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido.

⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash.

⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash.

⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash.

⁹ Ambi noadte bëda tauite ushë çonoc Sacadias aid shubun puduedpanëdash. Ēnden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash.

¹⁰ Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash.

¹² Adec tabadsho isash dacuëdampambo iquec, quetanec Sacadias uëdëquiampanëdash.

¹³ Adsho isash Nuquin Papan uaid mayan bëda nadpanëdash: –Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta.

¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiaish matses dadpen bëdambo iquendac.

¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin

Papan aton Mayan meniaidquio min mado iquendac.

¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icbo Nuquin Papa nec, queoaindac.

¹⁷ Min mado Nuquin Icbo bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icbo bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

¹⁹ Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique.

²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

21 Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo.

22 Aden yuen caimbudnubien puduenash on-quehuequi buëd cuëdenquiocpanëdash Sacadias. Adsho isun: —Ushquin isachimboen isbenac —cabededpanëdash. Adnubien Sacadiasën iccued-edquido nidmenuen mëdante uic-uiccapanëdash.

23 Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash.

24 Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash.

25 Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Èbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

26 Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash.

27 Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash.

²⁸ Adec choshon: —Mibi tantiaquin Nuquin Papan bédamboen icmiaidquoio mibi nec. Nuquin Icho mibëdi tabadendac —capanëdash Cabadedën.

²⁹ Adoaquien Madia, ¿Atotsi quepeba? quequin otacquoio tantiec tsadpanëdash.

³⁰ Adec tsadsho isun Cabadedën: —Dacuëndenda. Mibi bédamboen tantiaquin Nuquin Papan naden nanu quequin chiaid nad iqueque.

³¹ Chuinu. Tantiata. Bacuë usundoshon min mado mimbi tishendac. Tishun, Ēmbi tishaid Nuquin Papa yacno yuedanquidquoio nec, quequin Esus cuënta.

³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac.

³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquoio Madia usundomiaid, icsa nibëdquid, Nuquin Papan madombobi nec, utsibon cabededendac.

³⁶ Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë

6ted nidan usundoac.

³⁷ Utsin natiapimbo yaid Nuquin Papan naidquoio nec –quepanëdash Cabaded.

³⁸ Adoaquien Madia: –Ai, con Icbon nami-aidquoio nebi. Ma mimbi chiacpadquoio icpanuna –quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰ Adec nidashic Sacadias oncamenquoio yaidën shubu yacno choec puduedshun Sacadiasën chido, Edisabed istuidash: –Mibi isnuec chobi –Madia quepanëdash.

⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed

⁴² Madia chiec nadec comapenec on-quepanëdash: –Nuquin Papan bëdamboshë icmiaidquoio mibi nec. Mimbi usundoaid adembidi bëdamboshë icmiaidquoio nec.

⁴³ Nuquin Icbon tita mibi yec çatotsi quiash ëbi isnuec cho?

⁴⁴ Mibi isec chobi, mibi quesho ëmbi tantianubi, Cuishon, quiacbimboec con bacuë cuididiquianosh.

⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac –quepanëdash Edisabed Madia chiec.

Nuquin Papan naid chiec Madia cuëdënaid

46 Adnubien Madia nadec onquec
cuëdëmpanëdash:

“Nuquin Papan naid chuibanu. Tantia.

47 Ëbi usundomiaid Nuquin Papa yacno Yuedan-
quid nec, quequin tantiec bëdambo iquebi.

48-49 Ëbi ambi namiaid icsho bëdamboen isquin
Nuquin Papan naosh.

Adoacsho, Nuquin Papan bëdamboshë icmiaid Ma-
dia nec, quequin abitedishunquio tantiabe-
dedendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

50 Ambi chiaid tantiaquin naquid icsho,

Mimbi naid icsa cuidnu, quenquiocquin abëdi
shubu abentsëquën tabadacimboecnuc
adquid tabadmendac.

Adenuidi tantiaquin nampidquio abi iquec.

51 Nadatiambocquin naded-nadedquidquio
Nuquin Papa nec.

Ëmbibi tantiacpadomboen naimbi, quequid ic-
sho isun Nuquin Papan cacumiac uano
tabadendac.

52 Ancanquid dapa icboedi utsin namiaidquio
adquid iquendac.

Utsin namiaid icboedi chuiquid Nuquin Papan
icmendac.

53 Ambi chiaid tantiec bëdamboec tabadte
comapenec bunquiacpaden naquidquio
Nuquin Papan icmendac.

Con na ëmbi bedaiduidi tantiec bëdamboec
tabadebi quequid unësacsho cacumiac uano
tabadendac.

54 Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.

55 Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpanëdash.

56 Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

57 Adnubien Edisabedën bacuë tishthe ushë chonoc dada bacuë tishpanëdash.

58 Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsinquidotedi Edisabedbëd bëdambo icpanëdash.

59 Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi

60 Edisabed: —Padenquio. Abi cuëmëdquid Uan nec —quepanëdash.

61 Adoaquien utsibo: —Min matses utsi Uan cuëmëdquid nibëdec —qeshun

62 Sacadias ismenuequin mëdante uic-uiccaquin: —Abi cuëmëdquid chui. Tantianu —capanëdash utsibon.

⁶³ Adoaquien dada uate bedshun, Abi cuëmédquid Uan nec, quequin dada uaqin Sacadiasën ismepanédash.

Adoaquien: —¿Abimboda mimbi cape? — quecuededpanédash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibampanédash.

⁶⁵ Aden chuibansho tantiash: —Dacuédampambo iquec. ¿Atotsiepashun onquenquiocboedëmbi nëbi onquequin Nuquin Papan naid chuibampec? — quecuededpanédash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanédash.

⁶⁶ Adoac: —¿Mitsipadquidquo aton mado nepec? —quecuededpanédash Sacadiasën mado Nuquin Papan tantiamiaidquo isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chiec onquepanédash:

⁶⁸ “Nuquin Papa isadaidbon Icbo nec, quequin chuibanuna.

Aidën isadaidbo icsaquid icsho cuidnushe quiash abided

cuidadquid chomiac mayan icsan yuaid icboedi aidën

mënchictequidquo isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquo aid nendac.

⁷⁰ Ambi chuimiaidon chiampicpadembi

Nuquin Papan adquidquo icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin
tsusedpabo

aton tsyuecquidbëdtabi abi chieshënquido
nidtiapimbo yacnombo abi yacno yuedanquid
Nuquin Icbo Abentsëcquiobi nec.

⁷⁴ Abi cudasquin mënchicaid yec dacuëdenquio yec
Nuquin Papan namiaidombo iquendac.

⁷⁵ Adquid yec icsaisa abipadquio bëdamboec
tabadquid icsho
nuqui aidën isendac ënenquiocquin.”

Adec Esus chiec onquiashic nadece aton mado
chiec Sacadias onqueoapanëdash:

⁷⁶ “Adnubien nëbi Nuquin Papan chomiaid
chuibanquidquio

mibi nec, quequin utsibon mibi cuënendac, mado.
Nuquin Icbo choec, quequin utsibon tantiabicnuc
bëyuc tantiashun abi chuiquidquio mibi iquen-
dac.

⁷⁷ Adquid icquin mibi icsaquid icsho cuidnushe
quiash

abided cuidadquid tantiasho isash Nuquin Papa
mibi icsaid tantienquio yec bëpiscudendac,
quequin chuibanquid mibi iquendac, mado.

⁷⁸ Nuquin Papan matses tantiaquin naquidquio
icquin

abipadquidquio icsaisa abi yacnoshon chomi-
aidquio iquendac.

⁷⁹ Aidën tantiamiac unësash abi iquendac.

Adquid shubu abentsëquën tabadacpadece
tabadendac,

quequin mimbi chiendac, mado,”

quec Uanën papa Sacadias Nuquin Papan
Mayanën oncamiac onqueoapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

2

Esus tishaid
(*Mat 1.18-25*)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuiipanëdash.

² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

⁴ Adec utsibo nidnubien Ose aton chido Madi-abëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash.

⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash.

⁶ Ambo choquin aton bacuë nuambo usumpanëdash.

⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash.

⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash.

¹⁰ Dacuëdsho isash: –Chiaid bëda chuinuec chobique. Dacuëdenquiocquin tantiata. Chuinu. Ęmbi chuitequid bëda mibi, Cuishon, quetequid nendac.

¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomicaid tishosh.

¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomicaid Quidistu nec, mibi quependac.

¹³ Aden chiec Nuquin Papan uaid mayan bëda onquenubien abëdi abipadquid utsi

dadpen choash Nuquin Papan naid chiec naded
cuëdëncuededpanëdash:

¹⁴ “Nuquin Papa abucquio tabadquid abitedi
uaquidquio bëdamboshë iquec.

Nuquin Papan bëdamboen isaïdo ma abëdi tabad-
panuna,”

quec cuëdëmpañëdash.

¹⁵ Adec cuëdëdash Nuquin Papan uaido mayan
bëdabo abuc nidoapanëdash. Adec nidan obeca
pembenquin buanquido Nuquin Icbon chiaïd
nanuec: —Nuquin Papan nuqui tantiamboed
bacuëmpi isnuec Beden yacno nidnu. Nid —
quianec nidpanëdash.

¹⁶ Adec nidshun nidaidën capuquidën pete santen
bacuë nanacsho istuidpanëdash.

¹⁷ Isanec nidquimbi ambi isboedbëdta ambi tan-
tiaboed chiac

¹⁸ tantiaquidtedi: —¿Midapadquidien capec? —
quecuededpanëdash.

¹⁹ Aden obeca pembanquin buanquidon chi-
aid tantiash bëpiscudenquio yec Esusën tita, Ma-
dia, ¿Mitsipadquid con bacuë nepec? quequin
bëpiscudenquiocquin tantiadenepañëdash.

²⁰ Adnubien Nuquin Papan chiaïd chuiboc-
padquiocsho isash obeca yacno choash obeca pe-
mabanquin buanquido: —Ëmbi isboed ëmbi tan-
tiaboed Nuquin Papan naidquio nec —quequin
chiec onquecuededpanëdash.

*Nuquin Papa tabadte shubu uashunaid yacno
Esus buanaid*

²¹ Adnubien 7tedec ushtanquin aton madon
shui dëbid dëtemiacsho isun, Nuquin Papan uaid

mayan bēdan chiacpadomboen cuēnaid Esus nec, quequin Madian aton mado cuēmpañēdash.

²² Adshumbic, bacuē tishun aid bacuēn shui dēbid dētemeshun ushē abentsēc nidan utsi chotsēc nuc Moises Nuquin Papan dada uamiacpaden nanuen Madiabēdtan Osen Esus Edusaden yacno buampañēdash. Edusaden yacno choash Nuquin Papa tabadte shubu uashunaid yacno choshon, Con bacuē Nuquin Papan namiaidquo nec, quequin ismepañēdash.

²³ Nuquin Papan naden nata quequin chiaid nad iquec: Bēyuc tishaid dada bacuē ěmbi nami-aidquo con na nec.

²⁴ Mimbi bēyuc tishaid bedte bunquin ěbi tabadte shubu uashunaid yacno mimbi buanaid min mado cuidtequidoain dēbin daēd cuesunemeta. Dēbin nibēdnuc masēn bēdamboquid daēd cuesunemeta. Aden nanuec Edusaden yacno choash aton mado niantiapimbo yec Madiabēd Ose Nuquin Papan chiacpadomboen nanuec aton madobēdi puduedpañēdash.

²⁵ Adnubien Edusaden yacnombo tabadquid Simeyon cuēmēdquid Nuquin Papan naden nata quequin chiaid tantiaquin naquidquo icpañēdash. Aidi isadaidbo chuiquid dapa abentsēcquiobi cainquidquo icpañēdash. Aidi Nuquin Papan aton Mayan meniaidquo icpañēdash.

²⁶ Aidi Nuquin Papan Mayanēn tantiamiac, Chuiquid Dapa Abentsēcquiobi Nuquin Papan bēdamboen isaidquo choacsho unēsabicquin isendambi, quequin tantiapanēdash.

²⁷ Adembidi Nuquin Papan Mayanën nidmiac Nuquin Papa tabadte shubu uashunaid yacno nid-equi Simeyon puduedpanëdash. Ambo puduedash capunubi Nuquin Papan naden nata quequin chi-aidquo nanuen aton bënëbëdtambi Madian Esus bëpanëdash.

²⁸ Esus bësho isun Simeyonën Esus bedshun icucquin Nuquin Papan naid naden chuibanpanëdash:

²⁹⁻³⁰ “Abitedishun Icho icquin mimbi ëndenquo chiampid nëbi nëid isembi.

Nëid isash unësmene quenquo yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquo ispanuna.

³² Nëidëmbi mimbi tantiacpaden chuibanquin isadaidbo bëdambo icmendac,” quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash.

³⁴ Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiauidtsëqui naden Simeyonën chuoapanëdash: —Chuinu. Tantiata. Nëid bacuë tantiesä isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquen-dac. Min bacuë, Esus, Nuquin Papa yacno puduedmianquid nec, qesho tantiashun matses dadpen-shun icsamboen chuided-chuidedendac.

³⁵ Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac –quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënë bedac abëdi seta 7ted matamiash tabadnubi

³⁷ aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papan pauidi tantiaquin buna mëmumbudnequin Nuquin Papa chuidenepanëdash.

³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: –Isadaidbo icsaquid icsho cuidnu caid mënchictequid nëid nec –quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

⁴⁰ Ambo tabadnubi aton bacuë Esus dada bëdambo yec canicuempanëdash. Aidi comapenen tantiaquidquio Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ęmbi bëyuc tishaid unës uamenushe qeshun intaquën aton shubu shëcuë ëcnoshcacsho

isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiapadequi setan-setanquiec nidtenepanëdash.

⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash.

⁴³ Adec ambo nidashic nami uabicquid petequid tantiaid ushëtedi tantiec tabadtenepanëdash.

⁴⁴ Adec ambo tabadquin nainash Esus ambobi icnubi tantienquo yec Madia Osebëd auëshquo nidoapanëdash. Adec nidash inchëshbudtsëqui abëd chobedo yacno capuquin Esus nibëmbenepanëdash.

⁴⁵ Aden nibënquin istuidabi yec Edusaden yacno padpidec nidoapanëdash.

⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash.

⁴⁷ Adec onquec tsadsho isquin, Bëdamboen tantiaquin chuibanquidquo nëid nec, quequin utsi-bon tantiabededpanëdash.

⁴⁸ Adnubien, ¿Mitsipadquid con mado nepec? quequin otacquo Madian tantiapanëdash. Aden tantiequi: —¿Atotsi quiash ëbi daëdi tantienquo yec nëmbo choash mibi tabade, mado? Unësqiicquin papabëdtambi mibi nibëmbeniombi —capanëdash anin.

⁴⁹ Adoaquien Esus: —¿Atotsieshun ëbi nibëno? Con Pa shubu uashunaidën tabadnuec chobosh

nebi. ¿Tantienquioda mimbi icpe?

⁵⁰ Aden Esusën chuisho anibëdtan Osen tantien-quiocpanëdash.

⁵¹ Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tanti-aquin Esusën nadenepanëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadenepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid (Mat 3.1-12; Mad 1.1-8; Uan 1.19-28)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash.

² Ancanquid aidtedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash.

³ Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquo yacbimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantiashun mibi acten mentono, quequin cho-choquid cho-choquidquien Uanën chuidednepanëdash.

⁴ Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:
Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquo chosho isnu quequin cuembocnoc andëdshun ambescabanacximboen abimbo chuiquidënquo chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”
quequin Isayasën Uan tishabicnuc chuiquin dada uapampid nec.

⁷ Aden ënden chiampicpadequi Esus bëyucanequin acten mentomenuc cho-choquid

dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe queshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho?

⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan.

⁹ Adequi onquebudec: —Cuëte icsatedi matenu, quequin cuëte bacuësa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, queshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

¹¹ Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuibansho tantiashta: —Chian anëdënquequid

nësiate ictiapimbocquin ¿atotsimbi napeba? — quepanëdash.

13 Adoaquien: —Ancanquid dapan chiatedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

14 Adashic, adecbidi sondado cho-choash: — ¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaqin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

15 Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? — quecuededpanëdash cho-choquido.

16 Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan.

17 Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën.

18 Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

19 Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash.

20 Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe queshun.

Esus acten mentoaid
(*Mat 3.13-17; Mad 1.9-11*)

21 Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec

22 dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadeç aton Papa onquepanëdash: —Mibentsëquiobi icscho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi
(*Mat 1.1-17*)

23 Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiaish,

Nuquin Papan mado nec, quenquo yec mat-ses onquepanëdash. Esusën papapenquo Ose icnëdash. Madia aton tita icbo icnuc Esusën tsused-pabo nëidtedi iquec: aton buchido Edi cuëmëdquid icpanëdash.

²⁴ Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid,

²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid,

²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid,

²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid,

²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid,

²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matic cuëmëdquid,

³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid,

³¹ aidën papabic Medeya cuëmëdquid, aidën pa-

pabic Menan cuëmëdquid, aidën papabic Matata cuëmëdquid, aidën papabic Natan cuëmëdquid,

³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid,

³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid,

³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid,

³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid,

³⁶ aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid,

³⁷ aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid,

³⁸ aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

4

Satanas Esus icsamete bunaid
(Mat 4.1-11; Mad 1.12-13)

¹ Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoaquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash.

² Ushë utsi nidash utsi choaid abuc-totsëcquiecnuc ambobi tsadpanëdash. Aidedi ushquin penquio yash Esus bundopanëdash.

³ Bundoacsho isash Nuquin Papa chieshënquid choash Satanash nadpanëdash: —Nuquin Papan madombo icquin penun cuënotebi pete icta cata —capanëdash Satanash Esus chuiquin.

⁴ Adoaquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanash caic.

⁵ Adoshombic, macuësh dapa abucquio yacno Esus buanshun Satanash badedquio nidaidedi ismebampanëdash.

⁶ Ismiash: —Nidaidën icquidtedishun icbo icmiqidquo nebi. Abitedi con na nec. Embi menenu cac aidedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac.

⁷ Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmëmbi —quepanëdash Satanash Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa

abentsëcquiobi mimbi tantiaiduidtsëqui min icbombo neque. Aidën namiaidquio icta” — quepanëdash Esus Satanas caic.

⁹ Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta.

¹⁰ Naden dada uapampid iqueque. Tantia. Chuinu.

“Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

¹¹ Aidombi min taën tsasimbocquid tincanushe queshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

¹² Adoquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

¹³ Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuequin Esus tanun nanuna, quequin ambibi tantianec Esus nianec Satanas nidpanëdash.

Nasaded yacnocquido Esus bunesabo

(Mat 4.12-17; 13.53-58; Mad 1.14-15; 6.1-6)

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio

nec, quequin abi isquidon chiac dëuequidon tantiapanëdash.

15 Adnubic, Nuquin Papan chiaid chuibante shubu utsin-utsinguiec puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquo Esus nec, quec cuëdëncuededpanëdash.

16 Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash.

17 Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:

18 “Nuquin Icbon Mayanën namiaidquo nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquo nebi. Aidëmbidi Sathanasën yuaid Nuquin Papan bacuë icmenuequin chuibanta caidquo nebi.

19 Aidën Nuquin Icbon bëdamboen iste chuibanta caidquo nebi.”

20 Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash.

21 Adoac: –Nuquin Papan chiaid mimbi tantiaboed nëbimbobi tauadoec –quepanëdash Esus abibi chiadequi.

22 Adoaquien: –Bëdamboen chuipec. ¿Mitsipaden tantiaid ambi chiaid nepeba? –quecuededpanëdash. Adec onqueboedobi: –¿Osen mado Esus nenquioda ictic? –queoapanëdash.

23 Adoaquien: –Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec.

24 Abimbo chiembique. Tantiata –quiash Esus abi onquec: –Nuquin Papan ëmbi tantiamiacpaden chuibanta caidën abi caniacnoshon chuibansho tantienquiocquid icpec.

25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënuu chidobo dadpen icpampic. Aido adquid icnubien seta abentsëc chotsëcnuc matamec aton pete nibëdquiec yanubi isadaidbon bënuabo bunec tabadpampic.

26 Adec bunec tabadsho isun, Isadaidbon bënuu yacno nidta, quenquiocquin isadaidpembon bënuu yacno pemenuc nidta cac Edias nidshun ambi chiacpadomboen isadaidpembon bënuu nanuc aton pete uesadenquiocpampic. Aid chido shubu dadpen icquid Sadecta caid yacno

tabadpampic. Sadecta shubu dadpen icquid Sidon caid anoentsëqui icpampic.

²⁷ Adashic, adecbidi isadaidbo abi daushumbo yacno mishac mishadenquo yacbimboecquido dadpen icpampic. Adquido icnubien Nuquin Papan namiaidquo utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembo abentsëc Naman cuëmëdquid Ediseyon bëdamepampic. Èbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

²⁸ Aden Esusën isadaidpembo nashumpampid chuisho tantiash iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash.

²⁹ Adec nëishash nidanec nuntanuësh pudue-nanec shubu ënëdacno nidshun acte dapa quiusu-dacnombo nebudnuequin Esus buampanëdash.

³⁰ Aden nidmiaquien matses dadpen icquid nat-susash Esus nidpanëdash.

*Mayan icsa dapuduedaid cuemete
(Mad 1.21-28)*

³¹ Adec abi caniacnoësh Nasaded caid yacno nidtanashi nidaid Cadidia yacno nidequi Caped-naun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Pa-pan chiaid chuibampanëdash.

³² Aden chuibansho tantiash: –Ambia tantiaquidën chiacpaden chuibanquidien Esus nechitec –quecuededpanëdash anocquido.

³³ Aden Esusën chuibanubien Nuquin Papan chiaid chuibante shubu nuntan mayan icsa dapuedaid icpanëdash. Aidi comapenec sidquetanec onquec:

³⁴ –¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec –mayan icsan caquien:

³⁵ –Otacquio tabad. Adec tabadec dapuduenta –Esusën cac mayan icsan abi dapuedaid tacpanën nebudec icsa uainquio yec dapuduempañdash.

³⁶ Adosho isash tantiadempambo iquequi: –¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec –quepañdash Capednaun yacnocquido.

³⁷ Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

*Daicsambocquid dadpen Esusën bëdamiaid
(Mat 8.14-17; Mad 1.29-34)*

³⁸ Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpañdash. Ambo puduedacsho isun: –Simonën nachi chumboshë iqueque. ¿Ada aid bëdametsia? –caquien:

³⁹ Simonën nachi yacno choash dayunquio nidtuidec: —Chumbocquid dauebudta —Ësus quenubi badedquio dauebudpanëdash. Adec dauebudash nidtoshon codocashun Esusbëd icquido pemepanëdash Simonën nachin.

⁴⁰ Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash.

⁴¹ Adembidi mayan icsa utsi-utsien dapudue-mepanëdash. Adoac, Nuquin Papan madombobi mibi nec, quec sidquesho tantiashun: —Nuquin Papan chomiaid nec, quequin ëbi chiec adec on-quenda —Esusën cac mayan icsa ënëdpanëdash.

⁴² Adashic, badiadnuc matses nibëdacno Esus nidpanëdash. Esus nidacsho isun matses dadpen-shun nibënquin istuidshun: —Nidenquio yec ëbëdi tabadta —capanëdash istuidquidon.

⁴³ Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquiec pudued-cuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

*Abëd tabadmenuen chomiaid
(Mat 4.18-22; Mad 1.16-20)*

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash.

² Adnubien masi yacno aton cano daëd nëshun icbon aton nëshaidtedi pambampanëdash.

³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵ Adoaquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash.

⁷ Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubucubutsëcquiocnoc nuëcquid sandoac cano daëd mentoadtsempañdash.

⁸ Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanëdash Esus chuiquin.

⁹ Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo.

10 Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic.

11 Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid
(Mat 8.1-4; Mad 1.40-45)*

12 Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

13 Adsho tantiashun adquid daushumbocquid mishtemaïd nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

14 Aden bëdametanec Esus: —Ëmbi naid utsibo chienda. Adenquiocquin isadaïdbo tsusiobo ismetanta ma bëdamiaïd Nuquin Papan naid nec quequin ma aidon tantiapanu. Aido ismeshun Nuquin Papan ambi chiaïd Moises dada uamiampicpadembi bëdambo icmiaïd cuidtequidquio

meneta –capanëdash Esusën ambi bédameboed chuiquin.

¹⁵ Adnubien Esusën bédamesho isquidon Esusën bédamiaid chuibanac matses dadpen Esusën chiaid tantianuec cho-chopanëdash. Adecbidi, daicsambocquido bédanuec cho-choacsho Esusën bédamepanëdash.

¹⁶ Adashien matses nibëdacnombo nidash Nuquin Papa chiec onquepanëdash.

*Dada shëquëquenquiocquid bédamiaid
(Mat 9.1-8; Mad 2.1-12)*

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiaquid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bédamenuec Esus icpanëdash.

¹⁸ Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi

¹⁹ matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bédamec, quequin tantiaquin bëquidon ambi bëaid imbudsho isash dada shëquëquenquiocquid caic: –Mimbi tantiaid icsa cuidenquio yec

bëpiscudtequidquio mibi nendac —quepanëdash Esus.

21 Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papanuidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

22 Aidon tantiaid tantiec Esus: —¿Atotsi quiash mimbibi icsamboen tantiec onquepe?

23 ¿Mimbi tantiaid icsa cuidenquio yec bëpiscudtequidquio nendac ëmbi chiaidquio bëdantequidpenda nedic? Adecbidi, ¿Mibi icsambocboedi mibi bëdanoque. Nidtoash nidta, quequin chiaid bëdantequidpenda nedic?

24 Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac. Nuquin Papan chuimiaidquio nec mibitedi camenuen dada shëquëquenquiocquid naden chiembique Tantia. Nidtoash nidquin min di buanec nid —capanëdash Esusën dada shëquëquenquiocquid chuiquin.

25 Adoac nidtoshon aton di bedanec Nuquin Papan naboed chuibanequi aton shubuno nidpanëdash.

26 Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquiochoedëmbi nëbimbobi aid isbempombi —quecuededpanëdash.

*Debi, ëbi tsibanec cho, quequin Esusën chiaid
(Mat 9.9-13; Mad 2.13-17)*

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac

²⁸ Debi nidtoanec aton natedi nianec Esus tsi-bananec nidpanëdash.

²⁹ Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash.

³⁰ Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? — quepanëdash Esusbëd icquido caic.

³¹ Aden chuisho tantiash Esus nadpanëdash: — Ëbi bëdamec cho, quenquoio bëdambocquid iquec. Daicsambocquidien, Ëbi bëdamec cho, quendac.

³² Adecbidi, Nuquin Papan bëdamboen isaidquio icsho, Mimbi tantiaid icsa ënta, quequin chuinuec choenquoio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

*Buna mëmunaid
(Mat 9.14-17; Mad 2.18-22)*

³³ Aden Esusën chuibansho tantiashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquoio mibëd

icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec.

³⁵ Yucash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanequi abi Esus onquec: —Dashcute chuca cuëshun dashcute shë nibëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec.

³⁷ Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin.

³⁸ Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiaidquid yanec icsabudendac. Mibi adquid iquec, quequin tantiaquin utsi chiacbimboen Esusën padiseyobo chuipanëdash.

³⁹ Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

6

*Chonoadtemaid ushë tantiaquid
(Mat 12.1-8; Mad 2.23-28)*

¹ Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash.

² Aden pesho isquin padiseyobon: —¿Atotsieshun chonoadtemaid ushën chonoadpeque? Tantuan. Èbi chui —capanëdash Esusbëd icquido chuiquin.

³ Adoaquien: —¿Tsusedpa Dabid caidbëd icquidon piasquin pepampid tantiamboda ique?

⁴ Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash:

⁵ —Èbia: Tiboquenu, quia sh tsadacpadec mat-ses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi ic-samboen naic, quetiapimbo iquebi.

*Mëuesadaid bëdamiad
(Mat 12.9-14; Mad 3.1-6)*

⁶ Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash.

⁷ Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash.

8 Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

9 Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

10 Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

11 Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënquido.

Esusën, Ëbi chuibeneta, caido
(*Mat 10.1-4; Mad 3.13-19*)

12 Adashic, ushë utsin macuësh yacno matses nibëdacno Nuquin Papa chiec onquenuec nidash inchëshën ushenquio yec Nuquin Papa chiec Esus onquepanëdash.

13 Badiadshun abëd icquido dadpen chomeshun, Ëbi chuibeneta, quequin 12tedictsëqui chuipanëdash.

14 Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome;

15 utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa;

¹⁶ utsibic, Udas, Acobon mado; utsibic, Udas Iscadiote, yuecshun Esus chieshënquido Esus bedmequid. Aidedi, Esusën, Ëbi chuibeneta, caido icpanëdash.

Nuquin Papan bëdamboen isaïdo icnuc ambi ic-samboen isaïdo

(Mat 4.23-25; 5.1-12)

¹⁷ Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aïdo Esusën chuibansho tantianuec cho-choash tabadnubi, Ëbi bëdamepec, quequin tantiec utsibo choash tabadpanëdash.

¹⁸ Adec choquido mayan icsa dapuduedaid icsho isun Esusën dapuduemepanëdash.

¹⁹ Adsho isun nadatiambocquid Esus neque. Mishnu, qeshun mishequi bëdancuededpanëdash.

²⁰ Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

²¹ “Nëuëshquïo bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquïo matses Nuquin Papan chiaïd tantiesa icsho isash unësquïo yec shubidednequid Nuquin Papan bëdamboen isaïd yec abuc nidash ëbëd tabadec bëdambo iquebi quependac adquido.

22 “Esus tantiaquid icsho chieshënquin pudued cainquo yaid adembidi mua uaquin chuishunaid Nuquin Papan bëdamboen isaidquo nec.

23 “Adomboembidi ëmbi ëndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaidënshun adoaid iquec Nuquin Papa yacno choacsho ambi bëdambo icmi-aid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

24 “Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaïdo mibi nec. Nidaidënshun mimbi bedteniaiduidi tantiec Nuquin Papa yacno puduedtiapimbocquid mibi iquendac. Nidaidën bëdamboec tabadquin ënden bedondaidi mibi nec.

25 “Nidaidënshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

26 “Bëdambocquid nec, quequin mibi dadpenshun chuïsho tantienda. Adomboembidi mua uain Nuquin Papan ëndenquimbo chuimiaidpembon chuipampic. Aidon chiaïd tantiashun tsusedpabon Nuquin Papan chiaïd tantienquo yanampic. Adquido Nuquin Papan icsamboen isaïdo nec –quepanëdash Esus.

*Mibi uimanënquido tantiaquin nabanta, quiaid
(Mat 5.38-48; 7.12)*

²⁷ Aden chiashic abi Esus onquec: —Ëmbi chi-aid tantiaquidquio nad iqueque. Chuinu. Tantiata. Mibi chieshënquido bëdamboen tantiaquin nabanta.

²⁸ Adembidi mibi icsamboen chuiquid bëdamboen chuita. Adembidi, ëbi icsamboen naquido bëdamboen tantiaquin cuidenda, Papa, quequin Nuquin Papa chuita.

²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata.

³⁰ Utsibic, aton na nibëdquid, Bec cho, qesho meneta. Adembidi utsin mitsana ampesho isun cuidenquiocquin bëdamboen naoata.

³¹ Adembidi ëbi bëdamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ëbëd tantiananquiduidi tantianu, quec ¿bëdamboda mibi icpe? Padenquio. Adembidi Esus tantiesan abipadquiocquido tantiec.

³³ Adecbidi, Ëbi bëdamboen tantiaquin nashunquiduidi tantiaquin nashunoanu quec ¿bëdamboda mibi icpe? Padenquio. Esus tantiesan adembidi nashunquidquio nec.

³⁴ Adecbidi, Ëbi menequiduidi menenu, quec ¿bëdamboda mibi icpe? Padenquio. Esus tantiesan adenuidi menec.

³⁵ Naden nata, quequin chuinu. Tantia. Mibi chieshënquid icsho aid tantiaquin bëdamboen na-

banta. Adembidi mibi meniantiapimbocquid, Bec cho, qesho, Yucash cuidnanun nanuna, quenquiocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac.

³⁶ Nuquin Papan abi chieshēnquido nashundeni-acpadomboen mibi chieshēnquido nashundeneta —quepanēdash Esus.

*Icsambocquid nec, quequin chienda, quiaid
(Mat 7.1-5)*

³⁷ Aden chuibanashic Esus abi onquec: —Ēmbi tantiacpadomboen naisa icsambocquid nec, quenda. Adesa abi yacno choacsho Bēdamvocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bēpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bēpiscudendac.

³⁸ Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

39 Aden chuishumbic utsin tantienquo ictequid abëd icquido naden Esusën chuipanëdash: — ¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash.

40 Adembidi tantianuequidën abi tantiamequid dëniactiapimbo iquec. Tantiamic abi tantiamequidpadquid iquendac —quepanëdash Esus.

41 Adoshombic adembi tantiamequin naden Esusën chuipanëdash: —¿Atotsi quiash utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe?

42 Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc ¿atot-sieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacbimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

Cuëte abipadquid aton bacuë nec, quequin chiaid (Mat 7.17-20; 12.34-35)

43 Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic.

44 Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquo matses iquec. Adecbidi, echo bacuë isash, Bata nec, quenquo matses icoaic.

45 Adembidi bēdamboen tantiaquidēn ambi tantiacpadomboen utsi bēdamboen tantiaquin nabanendac. Adecbidi ambi tantiacpadec bēdamboec onquec. Adembidi icsamboen tantiaquidēn ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanēdash Esus.

Tantiaquidquo icnuc tantiauidquid nec, quequin chiaid
(Mat 7.24-27)

46 Adoshombic: —¿Atotsieshun, Con Icho mibi nec, queshumbi ěmbi chiacpadomboen naisa mibi ne?

47 Ębi yacno choshon ěmbi chuibansho tantiaquiash nidshun nadomboen naquidquo iqueque. Chuinu. Tantiata.

48 Cunquequid dapan chimeshnushe queshun shubu uaquidēn shĕcuĕ ěquĕduc uĕdĕshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ěbi tantiaquidquo icquin ěmbi chiaid papudedshun adomboembidi nabanquid nec. Adquidēn tantesa uainquio iquendac.

49 Utsibic nad iqueque. Tantia. Ęquĕduc uĕdĕshcabi nitsinaid cunquequid dapan chimeshunendac. Adecbidi, ěmbi chiaid papudeduidtsacpadomboen nabanenquio yec natiamianquid chonoc abi papudeduidtsaid bĕpiscudendac. Adquid uquĕ nĕsecatequid nendac —quepanēdash Esus.

7

*Sondado chuiquidën tantiaid
(Mat 8.5-13)*

¹ Aden iccuededquido chuiquin nainash Capednaun caid yacno Esus nidoapanëdash.

² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadtsëcquio icpanëdash.

³ Aton yua unëstiadtsëcquio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadtsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bédametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash.

⁶ Adec aidobëd Esus nidshobi sondado chuiquidën chomiaid utsibo choquin bëquedtuidash nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bédambocquid iquec con shubun puduedenquioctiadquidi mibi nec.

⁷ Ĕbi icsambocquid iquec mibi bēquedec nidenquiocobi. Mibi bēdamequid yec con shubun puduedenquiocquin mibi yacnoshombi, Bēdanta, mimbi cac con yua bēdampec.

⁸ Ĕbien sondado chuiquid nec. Ĕmbi nidta cacpadquiequi sondado nidec. Adecbidi, Cho, Ĕmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidēn cabocpadembi mibi chuipombi –quepanēdash sondado chuiquidēn chuitan caido Ĕsus caic.

⁹ Adoaquien: –¿Abimbobida cai? –queshun ambi chiaid tantiamenuequin iccuededquido Ĕsusēn bēisbanquin nadopanēdash: –Chuinu. Tantiata. Sondado chuiquid isadaidpembo Ĕbi tantiaquidpadquid isadaidbo nibēdec –quepanēdash Ĕsus.

¹⁰ Aden chiaquien sondado chuiquidēn chuitan caido aucbidi nidoash shubun puduedshun sondado chuiquidēn yua bēdamiaid istuidpanēdash.

Nianten mado uincuen uaid

¹¹ Adashic, ushē utsin shubu dadpen icquid Nain caid yacno Ĕsus nidpanēdash. Aidbēdi abēd icquido nidpanēdash. Adecbidi matses utsibo dadpen nidpanēdash.

¹² Adec nidequi Nain tsasi uaid quēnē shēcuē anoentsēqui choquimbi unēsaid bēquido bēqueduidpanēdash. Unēsaid epa icnubi ani niante icpanēdash. Niantebēd Nain yacnocquido dadpen cho-chopanēdash.

¹³ Adec cho-choec niante shubisho isash Ĕsus unēsquo yec: –Shubienquo yec ēnēd –quepanēdash.

14 Adec, Ënëd, quetanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuidsho isun: –Abuido, uëtsëdtota –cac

15 uëdtsëdtoash tsadec unësboed onquepanëdash. Adsho isash ani caic: –Në, unësboedi min mado uincuenoshe. Abëdi nidec nid –capanëdash Esusën.

16 Aden unësaid uincuemesho isash chochoquido: –Adopenshenda uincuemec –queshun Nuquin Papan naid chuibampanëdash. Aden chuibanec: –Nuquin Papan matses bëdamboen isnuen ambi chomiaidquio nuquibëd icmiosh –quec isquido onquecuededpanëdash.

17 Aden isash nidshun unësaid uincuemiaid isquidon chuibansho isadaidbon nidaid Udeya caid yacnocquidon tantiabempanëdash. Adem-bidi chiac dëuequidontsen tantiapanëdash.

Ëbitedishun cainaid mibi nec, quequin Uanën chii-aid

(Mat 11.2-19)

18 Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash:

19 –Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita –Uanën cac aid daëdi Esus yacno nidpanëdash.

20 Adec Esus yacno choash: –Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan – quepanëdash Uanën chomiaido Esus caic.

21 Aden chiaquien icsambocquid bédamequinc, mayan icsa dapuedaid dapuduemequinc, bëshuaid bédamequinc caquin Esusën ismebanpanëdash.

22 Aden nabanquin nainashic: –Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta.

23 Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta –quepanëdash Esus Uanën chomiaid daëd chiec.

24 Adashic, Uanën chomiaido nidambi iccuededquido tantiamebanuec Uan chiec Esus nadpanëdash: –¿Atotsi isnuec matses nibëdacno nidonda? ¿Cunquequidën ishacunaid isnuecta niddionda?

25 ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquio. Dashcute ushumbocquid dasiuidquido aton na dadpenquio

icquido ancanquid dapan shubun tabadquido nec.

²⁶ Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimaid isnuec nidënquioda ictionda? Ai, matses nibëdacno Nuquin Papan chuimaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic.

²⁷ Ëbi cain naden Uan Nuquin Papan chuimampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa
ënshun mibi cainquidombo iquendac.”

Aden ëbi cain Uan chuiquin dada uapampid nec.

²⁸ “Adembi Uan chuibanu. Tantiata. Nuquin Papan chuimaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidì quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹ Aden Esusën chuibansho tantiash: —Nuquin Papan naid bëdambo iquec —quepanëdash Uanën mentobanondaïdo.

³⁰ Utsiboen ambi tantiaid icsa ënenquio icquin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

³¹ Aden Uan chiash Esus: —¿Nuquin Papan chiaid nëbi chuisho tantiesa mitsipadquid nepeque?

³² Adquid chuinu. Tantia. Ambi tantiacpaden naisa icscho isash bacuëbo yachimboec nëishun mimbi icsamboen tantiec. Adembidi ambi tantiacpaden naisa icscho isun Nuquin Papan chaid tantienquoio iquec. Adquidën Nuquin Papan chuimiaidën nabansho icsamboen ispec.

³³ Nua cubudquin pesa Uan icscho isash, Mayan icsa dapuedaid nec, queposh Uanën chuisho tantiesä.

³⁴ Ęmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh.

³⁵ Aden tantienquiocquid, Bëdamboen tantianu, queshun bëdamboen tantiaquidënquoio chuibansho tantiasch abi tantiamequidpadquid iquendac — quepanëdash Esus.

Chidon Esus tanoshcaid

³⁶ Adashic, Ębi yacno pec cho, padiseyobo abentsëcshun cac aidbëd nidash shubun puduedash pete santen cuëshnudash Esus uepanëdash.

³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash.

³⁸ Aden bëequi Esus yuedacno choash puduedashun abi bëdamequid Esus istuidash, Ębi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bëdan chidon tanoshcapanëdash. Chidon aton na bedtequid

dadpen menequin comapenec noadte bēda bedshun Esusën taë tanoshcapanēdash chidon.

³⁹ Chidon adosho isash Esus yuedquid, Simon caid, abibi onquec: “Ēmbi yuedaid Nuquin Papan chuimiaid iquec, Ēbi mishquid icsambocquid nec,” quequin chido mishmenquio icpec, quepanēdash Simon.

⁴⁰ Adoaquien, tantiaquidquio icquin Esusën: — Mibi tantiamequin chuinu. Tantiata, Simon — capanēdash.

Adoaquien: —Aden chuiban. Tantuanu — quepanēdash Simon.

⁴¹ Aden tantiashun Esusën Simon ambi tantiaid icsa tantiamenuen utsi chuiquin nadopanēdash: — Bec cho. Yuecshun menenun nanuna, quepondash daëd. Abentsēcshun dadpen bedshunubi utsin daëdpactsēc bedshumpondash.

⁴² Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaaid ēbi cuidenda,” quequin abi bedshunēdaidēn abi daëdi chuipondash. Adoacsho, ¿Mitsiquid abi bedshunēdaid ēnenquiocquin tantiec bēpiscudenquio icpec? — quepanēdash Esus Simon caic.

⁴³ Adoaquien: —Ambi dadpen meneshun cuidenda caidien nechitec —quepanēdash Simon.

Aden chiaquien: —Ai, bēdamboen tantiaquin mimbi chioc —quiash

⁴⁴ Simon ismenuec Esus chido yacmi bidiadshun naden chuipanēdash: —Min shubun puduedacsho mimbi taë pante ēbi menenquiococ. ¿Nēid chido isquindactio?

Aidëmbien aton bëunën taë chucu uashun aton manëdaidën con taë bëchishaid ucposh.

⁴⁵ Min shubun ëbi puduedsho isun tanchocanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh.

⁴⁶ Bëchin manoshcaneza mibi iccoc. Padnueni nëid chidombi noadte bëdan tanoshcaniosh.

⁴⁷ Adembidi mibi chiembique. Tantiata. Mayan icsa dadpeshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yacbimboecquid mibi isembi —quepanëdash Esus chido chuioaic.

⁴⁹ Adsho tantiash: —Icsainquo yacbimboecquid mibi isembi, quec ¿mitsipadquid Esus nepec? —quepanëdash iccuededquido.

⁵⁰ Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno

shubu abentsëqui yacbimboec nidaidën tabadaid chuibenepanëdash. Abi bédamequid tsibananec chidobo nidpanëdash.

² Ambi mayan icsa dapuduemiaidobëdtan ambi bédamiaidon Esus tsibanampanëdash. Madia, Macada yacnoshon tishaid chedon Esus tsibanpanëdash. Mayan icsa 7ted dapuduemiaid Madia icpanëdash.

³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido ut-sibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat 13.1-23; Mad 4.1-20)

⁴ Aden chuibeniashtabadtuidtsëcnubi ambi chuiquin tantiambebedo cho-choquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash:

⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec.

⁶ Utsibic, cuënote dadpen samëdacno secac bad-edquio dëyucuidtsash nidaid ëquëduc tapun nidenquio iquec bidiquequid.

⁷ Utsibic, nisanquid dëyucacno secac aibdëdi dëyucash canidouidtsacsho nisanquidën bëtinac unësquid.

⁸ Utsibic, nidaid bēdan secac dēyucash caniaſh dadpen eſhēendac —quepanēdash Esus.

Aden chuibanashiċ: —Tantiate bēdambocquidēn ěmbi chuiboed tantiapec —quepanēdash.

⁹ Adoaquien: —¿Mitsipadquid tantiaid mimbi chuiboed icpec? Ębitedi tantiamequin chuioa —capanēdash abēd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedēmbi nēbi mimbi tantiabeneċ. Padnuen utsibon tantienquio yaid aid iquec. Aden chiac:

“Ęshē bēdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bēdambocquid icquimbi tantiesa icquin ma abimbo chiaid tantienquiocpanuna”
—quepanēdash Esus.

¹¹ Aden chiashiċ: —Ęmbi chuiboed nad iqueque. Tandia. Chuinu. Tiedēn caniquid pete eſhē icbon siaidbimboecquid Nuquin Papan chiaid nec. Ęshē siacno nidaidbimboecquid matsesēn tantiate nec.

¹² Podquedēn nidaid tsasimbocquidbimboecquid nad iquec. Nuquin Papan chiaid tantiaſh papuduedtiapimboċſho Satansēn bēpiscudmiaid adquid nec.

¹³ Cuēnote dadpen samēdacno nidaidbimboecquid nadquid iquendac. Nuquin Papan chiaid tantiaſh, Bēdambo iquebi, quiashiċ natiamianquieċ cametequid icnuc aid tantieċ Nuquin Papan chiaid papudueduidquid iquendac.

¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiash abi bunaid, abi nënaid, ambi natequid adquid tantiaquin Nuquin Papan chiaid bêtashacimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac.

¹⁵ Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuc.

*Tabote nënantan nanac chënquiacbimboecquid
(Mad 4.21-25)*

¹⁶ Aden chuishumbic naden Esusën chuioapanëdash: —Tabote taboshon matsun bêtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid.

¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac.

¹⁸ Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiembi, queshun papuduedmenquiocquin bëdamboen ismesa nec. Aden ambi tantiauidaid uesadendac —quepanëdash Esus.

*Aton utsibo aton titabëd choaid
(Mat 12.46-50; Mad 3.31-35)*

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac

²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoaquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

*Acte tëccoasquesho ënëdmiaid
(Mat 8.23-27; Mad 4.35-41)*

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash.

²³ Adec nidec cano anuequi Esus ushtopanëdash. Adec ush nubien cunquequid dapa comapenec cunquenubi acte tëccoasquequidën acte uemiac cano mentoadtsempanëdash. Adsho isash dacuëdec

²⁴ Esus ushacno nidshun tinec abëd icquido: —Nuqui mentoadequè. Isucun, Icho —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ènëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ènëd —Esusën cac badedquio acte tëccoasquequid ënëdoapanëdash.

²⁵ Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd

icquido dacuëdcuededquiequi, ¿Mitsipadquid nepec? Cunquequidbëdtabi acte tēccoasquequid ënëd cac-padequi ënëdchitosh, quec abëd icquido abibi on-quecuededpanëdash.

*Mayan icsa dapuduedaid dapuduemequin
bëdamiid
(Mat 8.28-34; Mad 5.1-20)*

²⁶ Adshumbic, acte tēccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash.

²⁷ Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash.

²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Èbi mëyanenda —quec onquenubien

²⁹ mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquo yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sinco midted dapuduedondaid nebi —quepanëdash mayan icsa dapuduedaid on-quec.

³¹ Aden chiashic: —Mibi bēdambocquid cadoque. Ënenquiocquin mēyanacno cuidnuequin ëbitedi nidmenda —quiashic

³² chanco dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bēdambo icpec? —quepanēdash mayan icsa dapuduedaid.

Adoaquien: —Aido dapuduedtan —Esusën cac

³³ dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibēdquiec unēsibunepanēdash.

³⁴ Adsho isash chanco pemequin isquido titinquianec shubu dadpen yacno choshon ambi isboed chuituidac

³⁵ anocquido istanu quianec Esus yacno chochopanēdash. Adec choshon mayan icsa dapudue mequin bēdamiaid dashcute dasiuidash bēdamboen tantiec Esusën taēno tsadsho istuidpanēdash. Adec aid onquesho isash anocquido, Uinsadpambo iquec, quiash dacuēdcuededpanēdash.

³⁶ Dacuēdsho isun mayan icsa dapudue mequin bēdamiaid isquidon ambi isboed dacuēdquido chuipanēdash.

³⁷ Aden chiac: —Nēuëshquio nidenquio icpec — quepanēdash dacuēdquido Esus chiec. Adoac Esusbēd icquido canon antabēdtopanēdash.

³⁸ Adsho isun: —Mibēd nidtiadquio iquebi — quepanēdash ambi mayan icsa dapudue mequin bēdamiaid Esus chiec.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido

chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

Chido intac budaid bëdanaid icnuc champi uin-cuemiaid

(Mat 9.18-26; Mad 5.21-43)

⁴⁰ Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido.

⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash:

⁴² —Con champi abentsëc tishaid unësanequidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash.

⁴³ Adnubien, chido seta 12ted matamec intac budaid chopanëdash. Aidi dauëchoquid dadpen-shun bëdametiapimbo icpanëdash.

⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquio

tabadcuededpanëdash. Adec tabadnubien: — Matses dadpeshun tsucus-tsucustsëcquiocquin mibi cuëscabededec —capanëdash Petedon.

⁴⁶ Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquiec mibi bëdanaye. Dacuëdenquo yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

⁵¹ Aden chianec Aidon shubuno nidash chochoquidotedi, Ëbëd puduedenda, quequin chianec Petedo, Uan, Acobo aidted buanec Aido cuëmëdquidën champi yacno Esus puduedpanëdash.

⁵² Ambo puduedshun anocquido unësqiuo yec shubisho tantiashun: —Mibi shubieque. Ënëdta. Champi unësenquo yec usheque —capanëdash Esusën.

⁵³ Adsho tantiashun, Champi unësacsho isombi, quequin Esus tantienquiocquin shubiquidon mamëshumbededpanëdash.

⁵⁴ Mamëshumbedednubi Esusën Aido cuëmëdquidën champin mëdante mëdinquin: — Nidto, champi —comapenen cac

⁵⁵ aton tiboedte unësabi yec champi badedquio nidtopanëdash. Champi nidtoshu isash: —Peme — quepanëdash Esus.

⁵⁶ Aton champi nidtoshu isash: — Adopeshenda iquec —quepanëdash ani amëbëdi.

Adoaquen: —Mimbi isboed chuibanenda — quepanëdash Esus.

9

Esusën ëbi chuibeneta, quequin ambi nidmiaido (Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi natiambocquin nabanacpaden mibitedishun nabanendac. Mayan icsa dapuduemequinc daicsaido bédamequinc cain mibi capucueniacnoshon mimbi ismebenendac.

² Nëbi mibi nideque. Adec capucuenequin chuibenequimbi bédamebeneta.

³ Nidquin cuate uidën nidte buanenda. Shic-toadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan.

⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta.

⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta — capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papanabëd tabadaid chuibanquimbi daic-saido bëdamebenepanëdash.

⁷ Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiashun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien;

⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoaquien: —Mambi uincuentiapimboconoc Uan mapi budtemiondac. ¿Tsudain ëmbi tantiacmaidquio adobanquid icpec? —quiashic Esus iste bumpanëdash Edodes.

Matses dadpen pemiaid

(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibansho tantiash Esus abëd icquido bëyucanec

shubu dadpen icquid Betsaida caid anoentsëqui nidpanëdash.

¹¹ Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

¹² Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsho isunda cho-choquidtedi pemenuëquin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac

¹⁵ ambi chiacpadomboen tabadmepanëdash.

¹⁶ Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

*Chuiquid dapa abentsëcquiobi iquec, quiaid
(Mat 16.13-19; Mad 8.27-29)*

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqreshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaid, Uan pa-doen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

*Abi unëste chiaid
(Mat 16.20-28; Mad 8.30-9.1)*

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec.

²² Aden comapenen chiashic Esus: —Ëbi matse-said icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidtedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen

uaindac –quepanëdash Esus abi uincuen uate chiec.

²³ Aden chiashic: –Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmane quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac.

²⁴ Cuesunenu cac unësmane quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuequid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac.

²⁵ ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec.

²⁶ Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi.

²⁷ Nad iquendac. Tantiaquiota. Chuinu. Ëbi tantiaquid dadpen yansho ënabicquid utsinutsinquien isendac –quepanëdash Esus.

*Esus bed-bedquesho istiapimbo yaid
(Mat 17.1-8; Mad 9.2-8)*

²⁸ Aden chiashic Esus mëdante utsiuc tauadoec ushash Nuquin Papa chiec onquenuec macuësh

yacno nidoapanëdash. Petedo, Uan, Acobo aiteded buanec macuësh yacno Esus nidpanëdash.

²⁹ Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquoio ushë chënquiacbimboec icpanëdash.

³⁰ Adsho isnubien badedquoio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid.

³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash.

³² Adnubien Esusbëd choboedo abëd icquido 3ted ushcasmash tabadtuidquin Esusbëd utsi daëd nac-nacquiocquid dasiuidacbimboec bedbedquesho isbededpanëdash.

³³ Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd choboedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquoio, con madombo, ëmbi bëdamboen isaidquoio neque. Aidën chiaidquoio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

*Mayan icsa dapuduedaid madompi
(Mat 17.14-21; Mad 9.14-29)*

³⁷ Adashic badiadash macuësh dapa yacnoësh Esus budsho isash bëquedec matses dadpen chochopanëdash.

³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëbcacushaniosh. Dapuduenenquio icquin con mado aidën uimambo icmedeniosh.

⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuequin aidon tanac dapuduenenquio iccosh —quepanëdash dada abentsëc Esus caic.

⁴¹ Adoaquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash.

⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: –Nuquin Papan nada-tiambocquin naid uinsadpambo iquec – quecuededpanëdash isquido.

*Abi unëste chuioaid
(Mat 17.22-23; Mad 9.30-32)*

⁴⁴ Adoaquien: –Chuinu. Bëpiscudenquiocquin tantiaquiota. Matsesacsho nëbi bedmendabi – quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquio tabadcuededpanëdash abëd icquido.

*¿Tsutsi chuiquid dapa icpec? quequin chiaid
(Mat 18.1-5; Mad 9.33-37)*

⁴⁶ Adashic: –¿Nuquin Papa yacno nidash chuiquid dapa mitsiquid icpec? –quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoaquien Esus tantiaquidquio icquin bacuëmpi chomeshun aton dayunquio tabëcash:

⁴⁸ –Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac –quepanëdash Esus abëd icquido caic.

*Abimbo tantiaquid ëbëd icquid nec quiaid
(Mad 9.38-40)*

49 Adashic, Uan Esusbëd icquid abentsëc nadpanëdash: —Mayan icsa dapuduemebanquid is-pombi. Aidi mayan icsa dapuduemenuec nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

50 Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

51 Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash.

52 Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien

53 Esus isadaidbo nec, quequin yuedenquiocpanëdash Samadia yacnocquidon.

54 Adoaquien, Acobobëd Uan nadpanëdash: —¿Ënabicquido unësmenuec mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

55 Adoaquien: —Padicnuna. ¿Matses unësmenuecabi chodio? —quianec

⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid
(*Mat 8.19-22*)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icho —quepanëdash.

⁶⁰ Adoquien: —Nuquin Papa yacno tabadnu quequin unësaid chococaquidëmbi ma chococapana. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido
(*Mat 11.20-27; 13.16-17*)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash.

² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui.

³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac.

⁴ Ëbi chuibenec nidanequin mitsana buanenda. Mitsana bedtequidbëdta shictoachte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta.

⁵ Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna.

⁶ Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac.

⁷ Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi

chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda.

⁹ Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita.

¹⁰ Shubu dadpen yacno choshon mibi yuedquid nibëdsho isun aton podquedën nidquin naden chuita:

¹¹ Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiata bunesa mibi icscho isash mibi yacno capuec ëbi tabitacquiaid tabesquenu. Is, quequin ismequin adota –capanëdash Esusën ambi nidmetequid 72ted icquido chuiquin.

¹² Aden chiashic aido chiec abi Esus onquec: – Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnocquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac –quepanëdash Esus.

¹³ Aden ambi nidmetequid 72ted icquido chuibanshumbic utsibo isacbimboen Esusën nadopanëdash: –Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan

chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, queshun unësquiocnoc shubiquin abi icsaid ëntsempampic.

¹⁴ Aden Tido yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Cödasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac.

¹⁵ Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquo. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

¹⁶ Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

¹⁷ Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapudenta

ëmbi caidtedi mayan icsa dapuduemposh, Icho —quecuededpanëdash ambi nidmiaido 72ted icquido ambi naboed Esus chuibanec.

18 Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimboecnuc bedquetanacimboec Satanas abucuësh badedquio paëdsho isec niobi.

19 Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac.

20 Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

21 Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icho nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen

tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabe-dedosh, Papa –quepanëdash Esus Nuquin Papa chiec.

²² Aden Nuquin Papa chiec onquequin nainec: –Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi –quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choboedouidtsëqui Esusën chuiopanëdash: –Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec.

²⁴ Nuquin Papan chiaid chiampidobëd ancandid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic –quepanëdash Esus.

Utsi tantiaquin bëdamboen naquidquio

²⁵ Adashic, ¿Tantiaquidquioda Esus neque? Tantiabono, abibi quequin dada utsin: –¿Nuquin Papa yacno tabadnuen atotsimbi napeba? chuibanquin tantiamequidën ëbi chui –capanëdash.

²⁶ Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adem-bidi bëdambo icmequin naban. Ëbi tantiaquin nashuntiaquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸ Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹ Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: — ¿Mitsicquid con utsi nepec? —quepanëdash.

³⁰ Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin ni-amposh.

³¹ Adoambi, cuestanquin nianaid uiacno podquedën choquin isadaidbo tsusion, Con

matses nenushe. Isnu, quenquiocquin uano datamposh.

³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh.

³³ Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin

³⁴ aton dayun tsadbudshun cuestanquin nianaidën chiuëtedi aton dauëmbi bënoshcashun bêtaneshumposh. Aden bêtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh.

³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus.

³⁶ Aden chuishumbic: —Ëmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷ Adoquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: –Adembidi mimbembi ëmbi chui-boedbimboecnuc utsibo tantiaquin nashunoata – quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash.

³⁹ Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash.

⁴⁰ Adec tsadquin Madian tantianubi Madtan ambi natiadquo yaidtedi tantiaquin nabampanëdash. Aden nabanequi Esus yacno chosho: –¿Con chibin ëbëdtambi nainquiosho isenquioda mimbi ique? Min utsibëdtan nabanta, cata, Icbo –capanëdash Madtan Esus chuiquin.

⁴¹ Adoaquien: –Mimbi natiadquo yaid dadpen tantiaquidquo mibi iqueque.

⁴² Ëbi tantiaquidquo icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi –quepanëdash Esus Madta caic.

11

Nuquin Papa chiec onquianete

(Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: –Nuquin Papa chiec onquianeta quequin Uan padon abëd icquido

tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

² Adoaquien: —Nuquin Papabëd onquequin naden chuita:

“Bëdambocquidquio mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquio napashun, Papa.

³ Tantiacidquio, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴ Adecbidi utsin ëbi chieshënsho cuidenquio yec ëbi abi icsaid bëpiscudacpadquiequi ëbi icsasho cuidenquio yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, quequin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquéc. ¿Adquid icnuda inchëshpotsembo abi yacno nidshun pete mimbi bedshumpatsia?

⁶ Inchëshpotsembo pete bedshunuec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenu bedec chobi. Mimbi meniaid cuidquin adquidi mibi meneoaimbi,’ quepatsiac mibi mibëd nashunanquid caic.

⁷ “Adoaquien, nuntanuëshi: ‘Padi. Shëcnandombi. Con bacuë ishacunec din ictoshon

mibi menetiapimbo iquebi,' quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimbi nidenquiocquin chuidonesho tantiashun mimbi chuiboedtedi mibi menepatsiash –quepanëdash Esus.

⁹⁻¹⁰ Aden chiec abi onquec: –Adomboembidi Nuquin Papa chuidonesho mimbi bedtiadquio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi?

¹² Adembidi, ¿Cachinan bacuë bec cho, queshoda mimbi chichun menedi?

¹³ Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? –quepanëdash Esus.

*Bedtsibun namiaid Esus nec, quequin chiaid
(Mat 12.22-30; Mad 3.19-27)*

¹⁴ Adashic, mayan icsa dapuduedquin eme uaid icsho Esusën istanquin: –Dapuduen –cac mayan icsa dapuduepanëdash. Adec dapuduenan ambi eme uaid onquepanëdash. Adsho isash tantiadem-pambo yec iccuededquid dadpen tabadcueded-panëdash.

15 Utsiboen: –Mayan icsan icbo Bedtsibu caidën tantiamiac mayan icsa Esusën dapuduemepash icnui –quepanëdash Esus chieshënquido.

16 Adnubien iccuededquid utsibo: –Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi – quepanëdash iccuededquid utsibo Esus caic.

17 Aden chuisho tantiash tantiaquidquio yec abi icsamboen chuimenuequido chiec Esus nadpanëdash: –Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac.

18 Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadac? Adembidi, ¿ambi mayan icsa dapuduemiac abëd icquido nibëdenquioda ictic?

19 Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe?

20 ¿Nuquin Papan tantiamiac mayan icsa dapuduemequid ëbi yec ambi chomiaidquio matses

chuiquid dapa mibi yacno ënden choabida ictio? — quepanëdash Esus abi chuimequido chiec.

²¹ Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec.

²² Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemoed mayan icsa dapuduedoaid (Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh.

²⁵ Adec nidshun abi dapuduemoed naden istuidposh. Mayan icsa nidan, Ëbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid mene-tiapimbo icnuc abi dapuduemoed choshon aid abentsëcquio

²⁶ istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

²⁷ Aden Esusën chiambien iccuededquid chido: —Mibi tishacsho shuma chishmiondaid Nuquin Papan bēdamboen isaid icpec —quepanēdash Esus caic.

²⁸ Adoaquien: —Aden nasho padenquio. Nuquin Papan chiaid tantiashun nabansho Nuquin Papan bēdamboen isaidquio nec —quepanēdash Esus chido caic.

*Onasën ismiampicpaden ismiaid
(Mat 12.38-42; Mad 8.12)*

²⁹ Adnubien abi yacno cho-choash utsi dadpen iccuededsho isun Esusën nadopanēdash: —Nēbi nidaidēn tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac.

³⁰ Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon embededpampic.

³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonēn chiaid tantianuec ēnapenuēsh choshon tantiash, Abimbo iquec, quepampic. Nuquin Papan matsesën naid icsa ambi naid bēdabēdta chuibante ushē chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bēdamboen tantiaquin chuiquid dapa Sadomon icmepampic.

Abitedi tantiampidquoio nëmbobi iqueque. Ëmbi chiaid tantiata.

³² Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquoio icsho Nuquin Papan mibitedi isendac. Nuquin Papan chuimiac Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimaidquoio icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata — quepanëdash Esus abibi chiadequi.

Tabote taboshon bëtashenquoio yacbimboec abi bëdamboec tabadaid ismequid

(Mat 5.15; 6.22-23)

³³ Aden chuishumbic Esusën abi chuibanec: — Tabote taboshon ompoesa. Adembidi matsun bëtashesambo icbo nec. Ma ëmbi yuedaidon is-nueshun tabote nënantan nanquid.

³⁴ Adoaidbimboec min tantiata iquec. Min tantiata bëdamboquid icquin bëdamboec tabadquin ismequid mibi nendac. Bëtashacbimboec min tantiata icnuc icsamboen ismequid mibi nendac.

³⁵ Con icbo ëbi bednuec choec qeshun bëpiscudenquiocquin isted-istedta.

³⁶ Min tantiata icsaisa icsho Nuquin Papan chiacpadomboen tantiaquidquoio aidi nec, quequin utsibon mibi isendac — quepanëdash Esus.

Nuquin Papan icsamboen isaidquoio

(Mat 23.1-26; Mad 12.28-40; Duc 20.45-47)

³⁷ Aden Esusën chuibanshobien padiseyobo abentsëcshun: —¿Ada ëbi yacno pec nidtsia? — capanëdash. Adoac aidbëdi nidash pete sanaid cueste dayunquio Esus tsadbudpanëdash.

³⁸ Adec Esus tsadsho isash, ¿Adpecshenda iquec. Penush mëpamëdenquio Esus icpec? quec abibi onquequin padiseyobon Esus yuedquidëmbi tantianëdash.

³⁹ Adoaquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec.

⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dad-abëdtabi tantiate uainquioda icpampic.

⁴¹ Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

⁴² Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin.

Aden nabanquin Nuquin Papan ambi matses bēdamboen tantiaquin nabanacpaden naisabo mibi nec. Min tiedën caniquid dies yacno cuēscāquin tambanshun Nuquin Papan chiacpaden abentsēc menebanshun utsibo bēdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo.

⁴³ Adembidi, tsusio dapabimboecsho bēdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adom̄boembidi tantiec matses iccuededacno nidequi, Ēbi bēquedquidon ěbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec.

⁴⁴ Adembidi, matses unēsaid chococate manenushe queshun ismequin mabiunu, quenquio yacpadomboen ěbi icsaid tantianushe quequin om̄poquid mibi nec –quepanēdash Esus padiseyobo chiec.

⁴⁵ Adoāquien, Nuquin Papan naden nata quequin chiaid tantiembi, quiash utsibo tantiamequid abentsēc: –Padiseyobo chuiquin ěbipadquido mimbi chuioapec –quepanēdash.

⁴⁶ Adoāquien: –Nuquin Papan ěndenquimbo naden nata quequin chiaidbēdta mimbi naden nata quequin chiaid dadpen chuibanquin matses mimbi namec. Adoac aidted matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen

min tsusedpabon cunesunepampic. Tsusedpabon cunesuniampido ënenquiocquin tantianu quiacbimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec.

⁴⁸ Aden naquin tantiec, Nuquin Papan chuimaido cunesunequin bëdamboen tsusedpabon nampampic, quiacbimboen tantiaquid mibi icnuc ambi chuimiampido cunesuniampidobimboecsho Nuquin Papan mibi isec. Nuquin Papan icsamboen isaidquio mibi nec.

⁴⁹ Ëmbi chiacpaden chuibanta, cabicquin naden Nuquin Papan chuipampic. Ëmbi chuimaid utsi-utsien aton matsesën mëyampec. Utsi-utsien mëyanshun cunesunepec, quec Nuquin Papa abitedi tantiaquidquio adpampic.

⁵⁰ Aden min tsusedpabo Nuquin Papan chuimaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimaid tantiesambo mibi nec. Adquido iquec ënden mëyanampidpadquido mibi neoaic. Aido cunesuniampidpadquido mibi neoaic.

⁵¹ Tsusedpan abia abed cunesunepampid icnubi ambi tsyuec Sacadias cunesunepampic. Aid Nuquin Papa tabadte shubu uashunaid dayunquiobi aidon cunesunepampic. Ai, Nuquin Papan chiaid tantiesatedi ambi chuimaido cunesuniampidpadquido nëbi icquid neoaic.

⁵² “Nuquin Papan naden nata quequin chiaid tantiembi, qeshun utsibo tantiamenquiocsho Nuquin Papan icsamboen isaido mibi nec.

Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic –quepanëdash Esus Nuquin Papan naden nata quequin chiaiduidi tantiaquido chiec.

⁵³ Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: –Esus icsamboen chuimenu –quiampanëdash.

⁵⁴ Adquid icquin Esusën chuibanacno nidaneshun chuimeoanuequin naden padiseyobon tantiaapanëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiembi, quequin tantiaquin Esus chuimepanëdash padiseyobon.

12

Natiamiantequidbëdtabi dayacmetequad (Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: –Sicaid nami

uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista.

² Matsesën ompoquin naid Nuquin Papan abitedi ismendac. Matsesën ompoquin chienquoio yaidbidi abitedi tantiamendac.

³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

⁴ “Adembidi chuiñu. Tantiata. Mibi cuesunenequid dacuëdënenda. Adquidën mibi cuesunequin mibi nibëdametiapimbo iquendac.

⁵ Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta.

⁶ Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquina Nuquin Papan mibi tantienquoio ictic.

⁷ Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon

*tantianubi chiaid**(Mat 10.32-33; 12.32; 10.19-20)*

⁸ “Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi.

⁹ Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bédabo chien-dambi.

¹⁰ Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquio yac bimboec bëpiscudta, Papa, qesho tantiaash aidën icsamboen chienquio yac bimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buamepec. Aden nanu, quequin buanaqui ¿Atotsimbi chuiquid dapa chuïpe? quequin tantienda.

¹² Nuquin Papan Mayanën mimbi chuibante mibi tantiamequè —quepanëdash Esus abëd icquido caic.

Aton na dadpen icquidën tantiaid icsa

13 Adashic, abi datsidadquid abentsëcshun: — Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

14 Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic.

15 Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

16 “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh:

17 ‘Con tiedën caniquid bacuë dadpen iqueque. ¿Atontsimbimbi aidtedi dayun uapeba?’

18 Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquio con tiedën caniquid bacuëtedi sandoshon dayun uanuna.

19 Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

20 “Adec abibi onquesho tantiashun, ‘Mimbi icamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

21 Aden chiashic: –Aton na dadpenuidi tanti-aquin Nuquin Papan chiapaden naisal yec aton na nianec unēsash Nuquin Papa yacno tabadti-apimbo iquec –quepanēdash Esus.

*¿Atotsimbi napeba? quesa icta, quequin chiaid
(Mat 6.25-34)*

22 Aden iccuededquido chuishumbic Esusën abēd icquido nadopanēdash: –Aton na dadpen icquidēn tantiapaden tantienda. ¿Con na nibēdnuc atotsimbi pepeba? quec dacuēdenda. Adecbidi, ¿Atotsibi dasiuidpeba? quec dacuēdenda.

23 Bēdamboec tabadnuequin mibi piasteuidi tantienda. Adembidi, Con dada bēdambo icmenuequin, Dashcute bedteuidi tantienda.

24 ¿Uicchunēnda ambibi cuēte ēshē siac bacuēacsho chepadic? Padenquio. Adecbidi, ambi dayun uatequid shubu nibēdnubi aton na nibēdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan?

25 Adecbidi, ¿mibi unēste ushē abimbo chonoc, Padi, quepecta mibi icti? Padenquio.

26 Adec mibi unēste chonoc, Padi, quetiapimbo mibi iquec ¿atotsi quiaash ¿atotsimbi pepeba? quepe mibi?

27 “Adembidi, cuētempi chuinu. Tantia. ¿Cuētempinda aton bacuē ictequid daēdcapec? Padenquio. Adoenquio yaid aton bacuē ictequid bēdaidquio iquec. Cuētempi bacuē ictequid bēdaidquio yacpadquid chuiquid dapa Sadomonēn dashcute adquio ictiapimbo icpampic.

28 Padnuen cuëte bacuë ictequid bēdaidquio icboedi badedquio sequiash chodquiacsho tauiq-uid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bēdiactsēc tantienda.

29 Aden tantienquio yec ¿Atotsimbi peshun aque? quec dacuëndenda.

30 Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbēdta èbi bedmedonec, quequin tantiec tabadta.

31 Adembidi, Nuquin Papabēd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid
(Mat 6.19-21)

32 “Nuquin Papan abi yacno mibi chomeque. Dacuëndenda, èbi tantiaquido caimbi.

33 Ambo nidabi icquin mitsana menebanquin mitsana bedtequid bedshun aton na nibēdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac.

34 Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanēdash Èsus.

Chieshenquiocquin caintequid
(Mat 24.45-51)

³⁵⁻³⁶ Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec.

³⁷ Aden abi cainquido aton icbon bëdambo icmequin nadopec: “Ëmbimbo mibi pemenu. Nëmbo tabadec cho,” qeshun ambi yuaido icbonquio pemequin bëdambo icmendac.

³⁸ Adembidi, icbo inchëshpotsambo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac.

³⁹ Adquidpenquio icbo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquio ictsenobi, quependac icbo.

⁴⁰ Adquiecbidi ampequid choacbimboec Nuquin Icbo choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

⁴¹ Aden Esusën chuisho tantiash Petedo: —¿Utsi chuiquin mibëd icquidouidi tantiamenuenda chio? ¿Abitedi tantiamenuenda chio? Tantiyanu. Ëbi chui —quepanëdash Esus caic.

⁴² Adoaquien: —¿Icbon chiac mitsipadquiocquin ambi namiaido bëdamboen napeba? Adquid

chuinu: Pete tambanshun musucshun ëmbi namiaid utsitedi bēdamboen menebanta, quequin ambi namiaid utsi abentsēc chianec icbo nidac.

⁴³ Adec nidashic choshon ambi chiacpaden ambi namiaidēn chieshenquiocquin nabanacsho isun icbon bēdambo icmiaid nendac. Adquid naden chuipec: Ēbi nidan chieshenquiocquin mimbi nabanoque.

⁴⁴ Ēmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon.

⁴⁵ Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshēnquin cuesbanshun ambentsēqui nua peshun tantienquio yanquin aquec.

⁴⁶ Aden nabanquin tantienquiocnoc aton icbo choshon ambi namiaidēn icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac.

⁴⁸ Aton icbo bunaid tantiabicquidēn cuesmetiadquiocquin nabansho aton icbon bēdiactsēc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iguendac. Adembidi, icbon dadpen meniaidon dadpen meneoatiadquidi nendac –quepanēdash Esus.

*Utsibēd bēdamboec tabadnu quesa icquin
cuëshēdmequid*

(Mat 10.34-36)

49 Aden chiashic abi onquec: —Ëbi tantiaquid icnuc ëbi tantiesa yec cuëshëndendac. Aido ënden cuëshëndondan ëbi tantiaquidombo bëdamboec tabadtsiandac, quec tsadebi.

50 Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi.

51 ¿Nidaidënsnun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi.

52 Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid.

53 Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëndendac. Shubu utsin aton mado ëbi tantiaquid icnuc aton papa adquid icnu quenquio yec cuëshëndendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëndendac. Shubu utsin, aton champi ëbi tantiaquid icnuc aton tita padenquio yec cuëshëndendac. Shubu utsin aton chaya ëbi tantiaquid icnuc aton babanën padenquio yec cuëshëndendac. Shubu utsin, aton babanën ëbi tantiaquid icnuc aton chaya padenquio yec cuëshëndendac —quepanëdash Esus. Abi tantiesa cuëshëdtequid chuibanec.

Nuquin Papan ismiente isun nad iquendac, quequin tantiaid

(Mat 16.1-4; Mad 8.11-13)

⁵⁴ Aden aböd icquidombo chuishumbic Esusën naden iccuededquido chuiopanëdash: —Inchësh chosho isec, Ue choec, quiacpadec choec.

⁵⁵ Adecbidi, ushë chënquéc chosho isash, Chumbo yampec quiacpadec iquéc.

⁵⁶ Aden isquin mimbi ëmbi nidaidënshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquío icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquío ique? —quepanëdash Esus iccuededquido caic.

Utsibëd chushcananquid
(Mat 5.25-26)

⁵⁷ Aden chiashic: —Utsibëd chushcananquido mibi nec. Adec tabadec ¿atotsi quíash, Naden natiadquidi nebi, quequin tantiashun mibi icsaid ënenquío ique?

⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomböen mibi nashunu, quequin bëdamboen chuita. Mibi adenquío icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec.

⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi pduentiapimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid ut-sibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantiata. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesunaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

² Adoaquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemiash, quequina mimbi tantiape?

³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun.

⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaaid uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequina mimbi tantiape?

⁵ Mimbi icsamboen tantieque. Utsibo unësacpadec unësmemane quequin mibitedishun mibi

icsaid ënta –capanëdash Esusën abi chuimeboedo chuiquin.

⁶ Aden chuishumbic utsitsen chiec: –Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec.

⁷ Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash.

⁹ Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh –quepanëdash Esus. Ëmbi tantiacpader tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaïd bëdamiaïd

¹⁰ Adashic, chonoadtemaid ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien

¹¹ seta dadpen 18tedi matamequin mayan icsan shuabudaïd icpanëdash.

¹² Adquid icsho isun Esusën: –Shuabudaaid icboedi nëbi cacueoaid mibi iquendac, chido – cashun

¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: –Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta – capanëdash iccuededquido chuiquin.

¹⁵ Adoaquien Esus: –Mimbi chiacpaden naise mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte yacno buanenquioda mimbi icpe?

¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? –quepanëdash Esus nëid ushën bëdamenda quequido tantiamequin chiec.

¹⁷ Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(Mat 13.31-32; Mad 4.30-32)

¹⁸ Adashic: –¿Nuquin Papan shubun icquido mit-sipadquidquo icpec?

19 Nadquidquio iqueque. Chuinu. Tantia. Icbon cuête ëshë pistsëcquiocquid mostasa caid nësecaid dëyucash nuamboshë caniec. Aid cuête caniaidën cuidin podochoquidën shubu uabed-edec. Adquiecbidi, Nuquin Papan chiaid chuisho tantiatsëcquidën tantiabenash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

*Sicaid nami uaidpadquid
(Mat 13.31-33)*

20 Aden chuishumbic utsitsen chuioaic: — ¿Nuquin Papan shubun icquido mitsipadquidquio icpec?

21 Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi — quepanëdash Esus.

*Pudued-puduedtequid shëcuë pistsëcquio chiaid
(Mat 7.13-14, 21-23)*

22 Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash.

23 Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantuan. Ëbi chui.

Adoaquien Esusën nadopanëdash:

24 —Nuquin Papa yacno pudued-puduedtequid shëcuë pïstsëcquïo iquendac. Esusquïo tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc,

25 Nuquin Icbon, Èbi yacno puduedte ushë naimbudosh, caqui cho-choshon, Èbi puduedme, quequin comapenen cuëmbededpec.

“Adoaquien: ‘Èbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

26 “Adoaquien: ‘Mibëdtambi peshun acbededombi. Èbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

27 “Adoaquien: ‘Icsaquido mibi neque. Nëmbo puduedenda,’ quepec Icho.

28 Aden chiaqui Abadauan yec Isac yec Acobo yec quec Nuquin Papan chuimiado aidtedi Nuquin Icho yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec.

29 Nuquin Papa yacno abi tantiesa puduedtiapimbocnobiën nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac.

30 Abi yacno choquido utsin namiaid icboedi utsi-utsiec chuiquid iquendac. Choquid utsi

chuiquid dapa icboedi utsi-utsiec utsin namiaido icoaindac –quepanëdash Esus.

*Edusaden isash anocquido Esus unësquiqotequid
(Mat 23.37-39)*

³¹ Aden Esusën chuibanquin naimbudnubien padiseyobo utsi-utsiec cho-choshon: –Ancanquid Edodes mibi cuesunemete buneque. Nëuëshquio nidec nid –capanëdash Esus chuiquin.

³² Adoaquien: –Edodes cuesunemenuecbimboec onquequidquo nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi.

³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita –capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: –Nuquin Papan chuimiaido cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Ëbi tantiaquid icmenu, quequin chuideniombi. Cachinan, Con bacuë chieshënquid choec, queshun nua shoccotsëcshun aton bacuë cudasquin mabësec aton podon. Adembidi: Mibi chieshënquid choec, queshun

mibi cudasquin chuibanombi. Aden chuisho tantiatiapimbo yec mibi tabadpoc.

³⁵ Adquido yec nēbi min shubun icquido cud-asquid ēbipadquid nibēdec. Nad iqueque. Tantia. Mibi chieshēnec cuesunenuequido choabicnuc ēbi nidacsho yuen ēbi isenquio mīmibi iquendac. Yue-cash abucuēsh choasho isash, Ambi chomiaid Nuquin Papan bēdamboen isaidquio nec, quequin tantienquiochoedēmbi tantiendac —quepanēdash Esus Edusaden uano icnuc Edusaden yacnocquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoadtemaid ushē utsin padiseyobo tsusio dapa isedec Esus puduedsho isun, Nēid ushēn natemaid icnuc Esusēn bēdamenushe queshun isnuequin padiseyobo utsibo tabadquin caimbededpanēdash.

² Aden caimbedednubien podo nidte chedo bidisquiaid uano tsadsho isun Esusēn:

³ —¿Chonoadtemaid ushēn daicsambocquid bēdamenquiocte ushē nec, quequina mīmibi tantiape? —caquien

⁴ abi caimbededquido otacquo tabadcuededpanēdash. Adec aido otacquo tabadcuedednubien podo nidte chedo bidisquiaid dada Esusēn bedshun bēdameshun: —Nidec nid —cac bēdambo yec nidpanēdash.

⁵ Aden aid nidmeshun abi bēdamenushe quequin caimbededquido caic: —¿Chonoadtemaid ushēn nua

uëdëshcaidën min baca ampaëdacsho isun bad-edquoio bedtanquin indoenquioda mimbi ictsia? — quepanëdash Esus.

⁶ Aden chuisho tantiash adquiobidi otacquoio tabadcuededpanëdash.

⁷ Adashic, tsusiobon dayunquoio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanëdash:

⁸ —Pec cho, cac choshon tsadte bëtinenda. Tsadte mimbi bëtinambien shubu icbon ambi pec cho caid utsi mibi chuiquid tsusio chosho

⁹ isun: “Chuiquid dapa choeque. Uano tabadad,” icbon cac icsamboen naombi quiash natiaic uano tsadpec mibi.

¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon.

¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹² Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoudi pec cho cainda. Aido pemiach, mibi pec cho caoic.

¹³ Pemenu, quequin aton na nibëdquido, daic-saidobëdta bëshuaido pec cho cata.

¹⁴ Adquido mibi cuidquin pemetiapimbo iquec. Adquido pemiash, Bëdambo iquebi, mibi quepec. Nuquin Papa yacno nidash puduedsho ambi

bëdambo icmiaid mibi iquendac –quepanëdash
Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abëdtan pec tsadquid abentsëc: –Nuquin Papa yacno nidshun abëdtambi pec bëdambo iquebi –quepanëdash.

¹⁶ Adoaquien aidi tantiamenuen utsi chiacbimboec Esus nadpanëdash: –Yuednu, quequin nadënquio pec chota, quequin ambi yuedtequid dadpen chuiposh.

¹⁷ Ambi chiacpadën ushë chonoc: ‘Ëmbi chui-boedtedi pec cho quequin chuitanta,’ cac aton yua nidposh.

¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

¹⁹ “Utsibic: ‘Baca bedshun, Bëdamboen nimban-quina buaneque. Isnu,’ queshun isedtanen-quiocquin ambi bedboed nimbameposh.

²⁰ “Utsibic: ‘Con chido bedombique. Nidenquio iquebi,’ queposh.

²¹ “Aden chuisho tantiash nidshun aidon chiac-paden aton yuan icbo chuioaposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

²³ “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun

tsucus-tsucustsëcquio yec ma adquido tabadpanuna.

²⁴ Abia ëmbi pec cho caidon ëbëdtambi petiapimbo iquendac, queposh icbo –quepanëdash Esus.

Esuspadquio ictequidquio

²⁵ Adashic, nidsho matses dadpenshun tsibanac abi choacmi bidiadshun isec Esus nadpanëdash:

²⁶ –Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic.

²⁷ Unësmane quiash mëyanac dayactiapimbocquid ëbipadquio ictiapimbo icoaindac –quepanëdash Esus.

²⁸ Aden chiec Esus abi onquec: –¿Shubu uanu, qeshun abia shubu uaid isec, Nëidtenquio nanu, qeshun aitedquiobidi bëshun toccashun shubu uainquioda icpec?

²⁹ Aden tantienquiocquidën abentse-abentsen bë-bëtsëcquin baded naintiapimbo iquec.

³⁰ Adsho isun utsibon mamënshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabënash adquiobidi icpec. Ëbi tantiauidtsëcquid ëbipadquio ictiapimbo iquec.

³¹ “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’

quesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec.

³² Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh.

³³ Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda –quepanëdash Esus abi tsibananquido chiec.

Sa batapentsëcquiocquid

(Mat 5.13; Mad 9.50)

³⁴ Aden chiashic Esus nadpanëdash: –Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic?

³⁵ Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantuanu, qeshun tantiacpadomboen nabanta –quepanëdash Esus.

15

Obeca abentsëc bënudtequid

(Mat 18.10-14)

¹ Adashic, icsaquid utsibobëd ancanquidën mat-sesën aton na buansho isun aton na bedtequid nëidtedi bedta caido, Tantuanu, quiash Esus datsi-dadpanëdash.

² Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³ Adoaquien, tantiaquidquio iquec Esus:

⁴ —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibë nec nidenquioda mibi icpe?

⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec.

⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec.

⁷ Adechidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac — quepanëdash Esus.

Aton na bedtequid bënudtequid

⁸ Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?

⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰ “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec –quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: –Aton mado daëd icnubi

¹² tsyuec tishaid aton papa caic: ‘Tsiusio budquin mimbi chiondacaden nëbi ëbi aiteded meneta, papa,’ quepondash. Adoac aton na musucshun aton mado abi daëdi menebampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash.

¹⁴ Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash.

¹⁵ Adec bundoquieci abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash.

¹⁶ Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

17 “Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi.

18 Nëbi con pa yacno nidshun naden con pa chiemi: Nuquin Papan chiacpaden nainquiocquin mibi tantienquo yec nidshun icsamboen nabanombique.

19 Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiemi,

20 abibi quianec aton papa yacno nidoapondash. Adec nidec ancuenquo yacno aton mado nidondaïd casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash.

21 Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

22 “Aden chiaquien bëdambo yanshun ambi namiaïdombo naden aton papan chuipondash: ‘Con mado ënden nidondaïd choashe. Dasiuidte bëdaïdquo bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta.

23 Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun.

24 Con mado unësacimboecboedi nëbi ëbëdi tabadoaic. Aidi bënudacimboecboedi nëbi istuidacimboec choash iquec,’ cac bacan bacuë cuesuneshun codocacsho pebededpondash.

25 “Adnubien bëyuc tishaid tied nantan icpondash. Auëshquio nidec shubu anoentsëqui choquin tentencate cuëdëmec matses cuëdënsho tantiatuidpondash.

26 Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

27 “Adoaquien: ‘Min utsi ënden nidondaid choaposh. Aidi chosho isash unësquiocquin nuquitedi bëdamboec tabadquin pemenuquin aton bacan bacuë nuacquid dapa papan cunesunemiosh,’ cac

28 bëyuc tishaid nëishash shubun puduedenquio icpondash.

“Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobëd bëdambo icnuec cho, mado,’ capondash aton papan.

29 Adoaquien: ‘Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cunesunemenquiocpaboc.

30 Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cunesunemepaboc,’ quequin bëyuc tishaidën aton papa chushcapondash.

31 “Adoaquien: ‘Mado, ëbëd icquid mibi nec. Adquid icnuc con natedi mitsana neyoc.

32 Min utsi unësacimboecboedi nëbi choash tabadoaic. Aidi bënudacimboecboedi nëbi istuidaid nec,’ quequin aton papan choboedën buchi chuipondash —quepanëdash Esus.

16

Icbon na icsamboen isquid

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh.

² Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,’ queposh icbo.

³ “Aden chiac icbon na isquid otacquo onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi.

⁴ Naden natsiambi. Con icbon na meniondaid abitedi cuidmenquo yac ëbi yuedtsiash,’ queposh.

⁵ “Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

⁶ “ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquo mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aidted bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

⁸⁻⁹“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquo iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

11 Adembidi mimbi nidaidëshun bedquin mimbi icsamboen nabansho isun, ¿Ëbi tantiaquid bëdamboen ista, quequinda Nuquin Papan mibi chuipeba? Padenquio iquec.

12 Adembidi, ¿utsin na isquin bëdamboen nashunenquio icsho isun abi yacno chosho isun mibi menependa ictic? Padenquio.

13 “Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanëdash Esus.

14 Aden chuibanubi aton na bedtequid ambi tantiaidquio icnuc chieshec padiseyobo tabad-cuededpanëdash.

15 Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

16 “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec.

17 Abuböd nidaid ënödtequid icnuc Nuquin Papan naden nata quequin chiaid ënödtiapimbo iquendac.

*Aton chido nianquid
(Mat 19.1-12; Mad 10.1-12)*

18 “Ad icnuc, aton chido bunenquiocquin aid nianshun chido utsi bedquid Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic –quepanëdash Esus.

Aton na dadpen icquid icnubien aton na nibëdquid

19 Adequi onquequimbi utsi chiacbimboen Esusën naden chuipanëdash: –Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acposh.

20 Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh.

21 Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

22 “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi

23 chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec.

24 Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

25 “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec.

26 Adboedi, uquëmbo mibi iquec cuëma utsiuc potetemaïd icnuc nëuëshquio nidtiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiposh.

27 “Adoaquien: ‘Ëbi yacno potetemaïd icnuc con pan shubu yacno Dasado nidme.

28 Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe queshun Dasado aido chuimetanta, papa,’ queposh aton na dadpen icboed.

29 “Adoaquien: ‘Nuquin Papan chiaïd, Moisesën dada uampidbëdta dada uaid utsi isec tsusiobo onquepayoc. Aden chiaïd ma min buchi adon tantiaquiopanuna,’ quequin Abadauanën chuiposh.

30 “Adoaquien: ‘Aïd tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

31 “Adoaquien: ‘Padicnuna. Nuquin Papa tantiesa icquin uincuemiaïdën chiaïd min utsibon tantienquio icpatsiash,’ caposh Abadauanën aton na dadpen icboed chuiquin —quepanëdash Esus.

17

*Matses icsaid chiaid, ambi Esus tantiaid chiaid,
ambi natequid chiaid*

(Mat 18.6-7, 21-22; Mad 9.42)

¹ Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac.

² Adquid ëbi tantiabenabicquid icsa uanabicsho cuënote yuëmbocquid têtanetanquin acte shodom-boshë yacno nënepatecnëdan.

³ Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantiaish aidi icsainquo yacbimboec bëpiscudta.

⁴ Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aitedecbidi aidi icsambo yenquo yacbimboec bëpiscudoata —capanëdash Esusën abëd icquido chuiquin.

⁵ Adoaquien: —Nuquin Papa nadatiambocquin nabanquidquo nec, quequin tantiaquidquo ic-tiadquo iquebique. Adquid ëbi icme, icbo —capanëdash abëd icquidon Esus chuiquin.

⁶ Adoaquien: —Cuëtempi ëshë mostasa caid pistsëcquo iquec. Siac dëyucash nua yanec.

Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nëid cuëtempicaic, Cuëte mananuc tabadboedi adqueiecbidi acte nantan tabadoata, quequin mimbi chiacpadec acte nantantsen abi tabadacpadecbidi tabadoaindac –quepanëdash Esus.

⁷ Aden chiashic Esus abi onquec: –¿Min yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimbi icpe?

⁸ Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic.

⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe?

¹⁰ Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icbo caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac –quepanëdash Esus.

Daushumbocquido bëdamiaid

¹¹ Adashic, Edusaden yacno nidequi nidaid Caididia caid ënëdacno nidaid Samadia caid yacno datambëtsenec

12 shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuïdpanëdash.

13 Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

14 Adsho tantiaashun Esusën: —Isadaïdbo tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

15 Adoac bëdamboed abentsëc dëbïdiadanec Nuquin Papan naïd chïec onquëc choaic

16 Esusën taëno tsadbudash: —Mimbi bëdameboc bëdambo iquebi —quepanëdash Esus caïc. Aïdi Samadia yacnocquïd isadaïdpembo nepanëdash.

17 Adoaquien: —¿Dïstedïdambi bëdamepo? —quepanëdash Esus dëbïdiadanec choboed caïc.

18 Aden chiashic iccuededquïdtedi caïc: —Nëïdi isadaïdpembo yequi dëbïdiadanec choash Nuquin Papan naïd chïec onquenubi ambi chïacpadomboen bëdameboed utsïbo isadaïdbo icquïmbi Nuquin Papan naïd chïenquïo icpec —quepanëdash Esus.

19 Aden chuïshumbic: —Mimbi tantïacpadequï mïbi bëdanoque. Nïdtoanec nid —capanëdash Esusën daushumbo icboedi chuïquin.

*Chuïquïd dapabëd bëdamboec tabadte chote ushë
(Mat 24.23-28, 36-41)*

20 Adshumbic: —¿Chuïquïd dapa abentsëcbëd bëdamboec tabadte ushë choaid mïspadënquïo nuquï ispeque? Tantïanu. Ëbi chui —capanëdash padïseyobon Esus chuïquin.

Adoaquien: –Chuiquid dapabëd bëdamboec tabadte ushë chote ismete nibëdendac.

²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi –quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: –Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac.

²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda.

²⁴ Nuquin Papa yacno bëdamboec tabadte ushë chonoc abu bedquetaniac bimboec uëshëmbo chënquec ëbi chosho abitedishun isbededendac.

²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec –quepanëdash Esus.

²⁶ Aden chiec Esus abi onquec: – Ëndenquimboshë Noe tabadnuc matsesën icsamboen tantiaded-tantiadednëdacadomboen ëbi choate ushë icnuc adembidi matsesën tantiadenepec.

²⁷ Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido

bedpampic. Adembidi tantiaquin aton champi menepampic. Aden tantiaquin nabanubien Noebéd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic.

²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiachimboecquid nëdënquetequid ue sequiachimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰ Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac.

³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec

nidenquoio yec badedquoio cuenta.

³² Mibi yacnocquidtedi unës uanushe bidadshun isenquoio yec cuenta, cac Dod cuenubien aton na tantiec aton chido aucbidi bidadsho unës uampidpadquid iquenda.

³³ Unësmane qeshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac.

³⁴ Ĕbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac.

³⁵ Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac.

³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac –quepanëdash Esus.

³⁷ Aden chuisho bëdamboen tantienquiocquin abëd icquidon: –¿Mitsimbo budpec, ícho? –capanëdash.

Adoaquien: –Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac –quepanëdash Esus abëd icquido caic.

18

Cadonequidquoio chido chiaid

¹ Adashic, Ĕbëd icquido chieshenquoio yec Nuquin Papa chiec onquian-onquianquidquoio

ma icpanu quec aido tantiamenu quec Esus nadpanëdash:

² —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh.

³ Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Ëbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiocboedëmbi chido ënëdenquio yec

⁵ choded-chodedquin adomboembidi chuiasho tantiashun: ‘Nuquin Papabëdta matses tantiesa nebi, quequimbi niante ënëdenquio yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidën chuiquioposh.

⁶ Aden chiashic Esus: —Choded-chodedquin chidon chuiasho tantiash: “Mibi icsamboen naquid cuidte chuinu,” queposh icsambocquid cuidte chuiquid.

⁷ ¿Adomboembidi ambi cuënaidon, Ëbi chieshënuquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba?

⁸ Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? — quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹ Adashic, bēdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanēdash:

¹⁰ —Nuquin Papa tabadte shubu uashunaid yacno Nuquin Papa chiec onquenuc nidnuequid daēd icposh. Abentsëc padiseyobo icnubi ancanquidën utsin na bedmianiaid utsi icposh.

¹¹ Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bēdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adechidi, choboed, ancanquidën utsin na bedtequid bedmianiaidpadquidpenquio nebi, Papa.

¹² Adembidi, chonoadtemaid ushë yambi chonoadtemaid ushë utsi choabicnuc daēdec ushquin mibi tantiaquin buna mēmundenembi. Adembidi, uno bedanquin dies yacno cuēscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Ēbi tantiaquin pauc, Papa,’ queposh —quepanēdash Esus.

¹⁴ Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bēdamboen isaidquio icnubien padiseyobo ambi icsamboen isaidquio icposh. Icsaisa yacimboec, Bēdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bēdamboen naid Nuquin Papan ismequin chuioaindac —quepanēdash Esus.

*Bacuëbo Esus yacno bē-bēaid
(Mat 19.13-14; Mad 10.13-16)*

¹⁵ Adshumbic, aton bacuëbo Esus mishmenuequin utsin-utsinquien bē-bēsho isun: —Bacuëbo bē-bēenda. Esusën nabanaid utsi iqueque. Nidanec nid —capanēdash Esusbēd icquidon.

¹⁶ Aden chuisho tantiaash Esus nadpanēdash: —Bacuëbo nidmenquiocquin con dayunquio chochrome. Chiac, Abimbo caic, quequin tanti-aquidquio bacuëbo nec.

¹⁷ Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanēdash Esus.

*Nēbi caniquid chuiquidën chiaid
(Mat 19.16-30; Mad 10.17-31)*

¹⁸ Adshumbic, nēbi chuiquid caniquidën: —Nuquin Papa yacno nidnuequin ¿atotsimbi nape? Bēdamboen tantiaquidquio icquin ēbi chui. Tanti-anu —capanēdash Esus chuiquin.

19 Adoaquien: —¿Mitsipaden tantiec bédambocquid nec, quepe mibi? Nuquin Papauidtsëqui bédambocquid nec.

20 Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

21 Adoaquien: —Canidotsëcquimbi aden nadeniondambi —quepanëdash nëbi caniquid.

22 Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

23 Aden Esusën chuisho tantiash aton na dadpen tantiec unësquio yanshun Esusën chiacpaden natiapimbo icpanëdash.

24 Adsho isun: —Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac.

25 Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid

tantiatiapimbocquid ambibi tantiacpadequi
puedte bunec —quepanëdash Esus.

²⁶ Aden chuisho tantiash iccuededquido
nadpanëdash: —¿Tsutsi Nuquin Papa yacno
puedtequid icpec? —quepanëdash Esus caic.

²⁷ Adoaquien: —Matses ambibi tantiacpadeq
puedtiapimbocnoc Nuquin Papambien abi
yacno yuedanquid matses tantiamendac —
quepanëdash Esus.

²⁸ Adoaquien Petedo: —Mibëd icnu, quequin
ëbëd icquidbëdtan con natedi nianondambi, icbo
—quepanëdash Esus caic.

²⁹ Adoaquien: —Abimbo mimbi chioque. Tanti-
ata. Chuinu. Nuquin Papabëd shubu abentsëquën
tabadaid chuibanuequin aton shubu icnuc aton
chidobëdta aton bacuëbo nianacsho

³⁰ ambi nianaidtedimbo tambanquin daëd ua-
banquin Nuquin Papan nëbi bëdambo icmeshumbi
abi yacno nidacsho bëdamboshë icmiaid mibi
iquendac —quepanëdash Esus Petedo chiec.

*Ëbi unës uaindac, quequin Esusën chiaid
(Mat 20.17-19; Mad 10.32-34)*

³¹ Adashic, abëd icquido uano buanash: —
Edusaden yacno nuquibi nidoaic. Ambo choac-
sho Nuquin Papan ëbi chuiquin dada uamiampic-
paden icsambocquin ëbi nabanendac.

³² Anoshon bedshun buanshun isadaidbon
isadaidpembo ëbi menendac. Aden meniac
bedshun ëbi mamënsumbededquimbi, icsamboen
chubededquimbi, dacuishtuabededquimbi,
dacuesbededtsëcquien mëyanshun ëbi cuesten
dectanquin unës uaindac.

³³ Adoqui daëdec ushtanec uincuenendabi — quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquo yec tabadpanëdash.

*Bëshuaid bëdamaid
(Mat 20.29-34; Mad 10.46-52)*

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

³⁶ Adec tsadquimbi matses dadpen cuencuensho tantiashun: —¿Atotsi quec cuen-cuene? —capanëdash.

³⁷ Adoquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquo yec tsad —capanëdash choquidon.

Adoquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun:

⁴¹ —¿Atotsimbi mibi nashumpeba? —capanëdash Esusën bëshuaid chuiquin.

Adoquien: —Bëshuaid nebique. Ëbi bëucshune, Icho —capanëdash.

⁴² Adoquien: —Mimbi tantiacpadomboen padpidemboen is —cac

⁴³ badedquoio isbenshun bëshuacboedën Esus tsi-banquimbi Nuquin Papan naid chuibanquin is-banec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash.

² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash.

³ Adoaid icquimbi utsi, Esus cuenec, qesho tantiash, ¿Mitsipadquidquoio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquoio icpanëdash.

⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquoio choec nid-tuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac

⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh — quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tantia, Icbo. Nëbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaqin menebanembi — quepanëdash Esus chiec.

⁹ Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec.

¹⁰ Icsambocquid Saqueyo icbocpadquid nibënquin istuidshun nëscanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash.

¹² Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’

¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata

ma choshon dadpen bedoapanuna,' quianec chuiquid ictiadquiocquid abi chuiquid dapa yacno nidposh.

14 "Adec aid nidambic abi yacnocquidon abi chieshënquido nadposh: 'Aidi ëbitedi chuiquid icmenushe queshun chuiquid dapa yacno chui-tanta,' queshun abëd icquido chuimenuen chuiquid dapa yacno nidmeposh.

15 "Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid çtedtsi daëd uapashba? abibi queshun ambi meneboedo chomeposh.

16 "Adoac bëyuc choquid: 'Mitsana bedtequid abentsëc icboedi utsi 10ted icnuc daëd uaombi, icbo,' queposh.

17 "Adoaquien: 'Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,' caposh abi chuiquidën.

18 "Adnubien utsi: 'Mitsana bedtequid abentsëc icboedi utsi 5ted daëd uapombi,' queposh.

19 "Adoaquien: 'Mimbi daëd uaidtedquiobi shubu dadpen icquid 5ted uano-uanoecquido chuiquid icta,' caposh abi chuiquidën.

20 "Adnubien utsitsen: 'Mimbi abentsëc menetsëcboed ëmbi dashcute cuëshaidën dayun uaboed në iquec, icbo.

21 Mitsana bedtequid mimbi tantiactedimbo daëd uatiapimbo ictsiabi, queshun dayun uaombi.

Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,' queposh.

²² “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiech quecta icco?

²³ ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,' queposh abi chuiquid.

²⁴ “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,' caposh abi chuiquidën.

²⁵ “Adoaquien: ‘Aton na dadpen iqueque. Aid menenda, chuiquid,' queposh iccuededquido.

²⁶ “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi.

²⁷ Adembidi ëbi chieshënec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,' caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(Mat 21.1-11; Mad 11.1-11; Uan 12.12-19)

²⁸ Aden chuibanashic Esus Edusaden yacmi nid-equi anoentsëqui choash nidtuidpanëdash.

²⁹ Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic:

³⁰ —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta.

³¹ Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

³² Adoac nidshun istuidtanquin

³³ cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash ichon.

³⁴ Adoaquien: —Con Icho bunaid nec —queshun Esus yacno nimbanquin abi tënëshaidën buampañëdash Esusbëd icquidon.

³⁵ Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpañëdash.

³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepañëdash. Chuiquid dapa Esus nepanui, quesahun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuedepañëdash:

38 –Nuquin Papan chomiaid ambi chuiquid dapa icmiaid ambi bēdambo icmiaidquiobidi nec. Nuquin Papa yacno abēdi bēdamboec tabadequi ic-saisatedi iquendac –quepanēdash iccuededquido comapenec cuēdcuededec.

39 Adec cuēdcuededsho tantiashun padiseyobon: –Adec onquenda, quequin mibēd icquido chuita –capanēdash Esus chuiquin.

40 Adoaquien: –Ēmbi naid chiec aidtedi cuēdcuededenquiocnoc cuēnote podqued cuēman samēdquido onquianendac –quepanēdash Esus padiseyobo chiec.

41 Adashic, adanec nidequi Edusaden anoentsēqui choquin anocquido abi tantiesabo tantiec shubiec Esus nadpanēdash:

42 –Ēbi bēdambo icmequid Esus nec, quec nēbi ēbi tantiaquid mibi ictsiandac. Tantiesa icquin mibi chuiquid mimbi nibēnacpadquid mimbi istu-
idtiapimbo iquendac.

43 Yuecash choquin uimanēmēnquidon mibi cuentiapimbo noc tsicatebudcuenendac.

44 Aden mibi tsicatebudcuenshun min bacuēbobēdtabi naimbudquin mibi unēs uashun nendac. Min shubutedi nibēdquiendac. Nuquin Papan chomiaid ēbi tantiesa icsho cuidtequido mibi nendac –quepanēdash Esus. Edusaden uano icnuc abi tantiesabo tantiec unēsquio icnuc anocquido chiacbimboec adpanēdash.

Nuquin Papa tabadte shubu uashunaid yac-noshon cuemiaid

45 Adashic, Edusaden yacno choash Nuquin Papa tabadte shubu uashunaidēn puduedshun

nuntanshunquio aton na bedtequid bednun menebanquido Esusën cuemepanëdash.

⁴⁶ Cuemec: –Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc –quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash.

⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

20

*¿Tsundan chuibanta caid mibi ne?
(Mat 21.23-27; Mad 11.27-33)*

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash.

² Cho-choshon: –¿Tsundan chuibanta caid mibi neque? Tantianu. Ëbitedi chui –capanëdash.

³ Adoaquien: –Ëmbia tantianu. Ëbi chui.

⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquo mibi quenuc, ¿Matesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi quesho tantiash Esus nadpendac. ¿Atotsieshun Uanën chuisho mibitedishun tantienquo icponda?

⁶ Matesën nata caid Uan pado niondash, ëbitedi quesho tantiashun iccuededquidon cuënoten nuquitedi se-sependac. Nuquin Papan chuimaid, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoaquien: —Mimbi chienquo yacpadembi ëmbitsen ëbi chuita caquid mibi chienquo icoaimbi —quepanëdash Esus.

Neshcashunquidon icsambocquin naid

(Mat 21.33-44; Mad 12.1-11)

⁹ Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic:

¹⁰ ‘Tiedën caniquid ënden bacuëpash. Ëbi neshcashunquidën musucaid con na bedmenu,’ queshun ambi namiaid aton tied yacno icbon nidmeposh. Nidmiac ambi bedtan caid

tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh.

¹¹ Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh.

¹² Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

¹⁴ “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna.

¹⁵ Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh –quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec?

¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid ut-sibo aton tied yacno tabadmendac –quepanëdash Esus.

Adsho tantiash: –Adoenquo icpashun – quepanëdash iccuededquido.

¹⁷ Adoaquien iccuededquido bëisequi Esus nadpanëdash: –¿Nuquin Papan dada uamiidën naden chienquioda icpampic? Ai, aidën chuipampid nad iquec: “Shubu uanuequidën isuidaaid buintad utsin ambia nitsinaid icposh.”

¹⁸ Buintad sec uebudec podquëd-podquënddac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac – quepanëdash Esus.

¹⁹ Aden Esusën chuisho tantiash: –Nuqui naid chiabimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid

(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash.

²¹ Aden nidmiac choash Esus ista caid abentsëc: –Mimbi tantiamequin chuibanaid bëdambo iquec,

quequin tantiembi, Abitedi Nuquin Papan chiaid abimbo chuibanquid mibi nec.

²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash:

²⁴ —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

²⁵ Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën.

²⁶ Aden chiac, Bëdamboen tantiaquidbimboec onquec, quequin tantiaquin icsamboen chuime-tiapimbo yec tsusiobon chomiaid otacquio tabad-cuededpanëdash.

*Uincuen uaid chido bedesa nec, quequin chiaid
(Mat 22.23-33; Mad 12.18-27)*

²⁷ Adashic, saduseyobo caido yec

²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic.

²⁹ Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh.

³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi.

³¹ Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh.

³² Yucash chidotsen unësoaposh.

³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantuanu —quepanëdash saduseyobo Esus caic.

³⁴ Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec.

³⁵ Uincuen uate ushë choan Nuquin Papan bëdamboen isaido abëdi tabadquin chido bedenquio iquendac. Adembidi, aton champi menenquio aton papan iquendac.

³⁶ Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquio iquendac. Nuquin Papan uincuen uatequido aton bacuëbo nendac.

³⁷ Adembidi chuinu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic.

³⁸ Moisesën tsusedpabo ambi chuiboed ënden unësampidën nami chodquiaidën papa cain Nuquin Papa cuëntiapimbo iquec. Aton nami

chodquiash abi tantiaquidquio icquin tantiec tsadquidën papa cain Nuquin Papa cuë nec — quepanëdash Esus saduseyobo chiec.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec.

⁴⁰ Aden Esusën chuisho tantiashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaid
(Mat 22.41-46; Mad 12.35-37)*

⁴¹ Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec?

⁴² Dabidën ambibi Sadmo caid dada uaquin naden chuipampic:

“Icbo utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquio cainec tsadec cho

⁴³ ma mibi chieshënquidtedi mimbi namiaid ma icpanu,’”

quequin Nuquin Papan Esus chiaid Moisesën dada uapampid nec.

⁴⁴ Aden Dabid padon dada uaquin ¿mitsipadom-boentsibi con icbo cashumbi con mado ëbi caoapampic Dabidën? —quepanëdash Esus abi chieshënquido caic.

*Naden nata quequin chiaid tantiamequid-
padquid iquenda, quequin chiaid
(Mat 23.1-36; Mad 12.38-40; Duc 11.37-54)*

⁴⁵ Aden chuishun iccuededquidon tantianubi abëd icquido Esusën nadopanëdash:

⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda.

⁴⁷ Aidon bëdamboen nabanacbimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden bëdamboen nabanacbimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

21

*Nianten piucquid shocoshëmpi meniaid
(Mad 12.41-44)*

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaido Nuquin Papa tabadte shubu nacnemetec cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na

bedtequid dadpen icquidon dadpen sandobededsho isquimbi

² nianten aton na nibëdquidëmbi aton na bedtequid shocosh daëd ictsëcquid sandosho ispanëdash.

³⁻⁴ Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite
(Mat 24.1-35, 42-44; Mad 13.1-37)*

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶ Adoaquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepanëdash Esus.

⁷ Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tantianu. Chui —quepanëdash utsibo.

⁸ Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda.

⁹ Adecbidi: “Cuesnancuededec,” qesho tantiash dacuëndenda. Nuquin Papan chiampicpadequi cuesnancuededteba iquendac. Aid icnubi abitedi

naimbudte ushë badedquoio choenquoio iquendac
—quepanëdash Esus.

¹⁰ Aden chiequi abi onquebudec: —Adecbidi, abi
ancaquid dapan nidmiac nidaid utsin icquidobëd
cuesnancuededendac.

¹¹ Adecbidi, nidaid utsi-utsiec yacno canched-
nuec ishcuđ-ishcuđendac. Adecbidi, utsi-utsiec
yacno bunquiqote iquendac. Adecbidi, utsi-utsiec
yacno daicsabudnete iquendac. Adecbidi, mibi
dacuëdmetequid iquendac. Adecbidi, mimbi isac-
maid abucuësh natiambo icsho mimbi isbededen-
dac.

¹² “Aidtedi choabicnuc ëbi tantiaquid utsi-utsien
bedshun mëyanendac. Adobanshumbic, Icsam-
boen naquid nec, quequin muaquin icsaquid
cuidnuequid yacno mibi buanendac. Utsi-utsien
ancanquid yacno buanac

¹³ aidotsen tantiaquid yantsiash queshun ëbi
chuibanta.

¹⁴ Aden buanaqui, ¿atotsimbi ancanquid cape?
quequin tantiec tsadenda.

¹⁵ Nuquin Papan Mayanën tantiamiacpadom-
boen mimbi chuibanendac. Adoac, Icsambocquid
mibi nec, quetiapimbo mibi chieshënquido iquen-
dac.

¹⁶ Adembidi, Nuquin Papan chiaid tantiesan
min shubun icquidën mibi bedshun cuidnuequid
yacno buanash: ‘Cuidquin cuesuneta,’ quepen-
dac. Aton papambi adotsiash. Animbi aton mado
adembidi adotsiash. Utsi aton buchimbi adoat-
siash. Utsi aton chuchumbi adoatsiash. Utsin
abëdtan isedquidëmbi adoatsiash.

¹⁷ Ebi tantiaquid chieshënquid dadpen iquendac.

18-19 Aden nabanquin mibi cunesunemenu, cac chieshenquo yec, Esus tantiaquid nebi, quequid icta. Adquid iquec unēsash ënēdenquo yec Nuquin Papabēd mibi tabadendac.

20 “Adecbidi shubu dadpen icquid Edusaden caid yacno cuesanquid dadpen cho-choshon tsi-catebudsho isash, Edusaden yacno naimbudte ushë choec, quequin mimbi tantiendac.

21 Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquo cuempanuna. Adecbidi, dëuequido Edusaden yacno ma nidenquiocpanuna.

22 Aid ushë icnuc Nuquin Papan chiacpadom-boen cuidtequid iquendac.

23 Aid ushë chonoc matses utsibon Edusaden yacno tsiatebudac pete naimbudnuc bacuë usunquidobēd bacuë chishmequido mëyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac.

24 Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsiateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

25 “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsested

tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac.

²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac.

²⁷ Adnubini Nuquin Papan chomiaid matsesaid ëbi dasiuidaïd bëchomauanquiec ushë chënquiacimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac.

²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta –quepanëdash Esus.

²⁹ Aden chuishumbic ambi chuiboed ushë chote tantiamenuen nadopanëdash:

³⁰ –Cuëtempi bacuëacsho isash, Ënden suc sec-cuduquiac nëbi seta taëec, quequin matsesën tantiec.

³¹ Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec.

³² Abimbo chiembique. Tantiata. Ëmbi chuibamboed naimbudabicnuc con tan matses isadaïdbo naimëdbudenquio iquendac.

³³ Abubëdta naimbudtequid nidaïd nendac. Ëmbi chiaïd abimbo iquendac.

³⁴⁻³⁵ “Adembidi chuinu. Tantiata. Nidaïdën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiata ushë choec, quequin tantienquio yec chieshquin badiadquidën-badiadquidënnuquen paëmbocquid actenepec.

Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta.

³⁶ Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieci macuësh Odibos caid yacno nidash tabadtenepanëdash.

³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(Mat 26.1-5, 14-16; Mad 14.1-2, 10-11; Uan 11.45-53)

¹ Adashic, nami uabicquid pete tantiate ushë, Pascuas caid, anoentsëqui yampanëdash.

² Aid ushë choabicnuc isaidaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden

Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash.

³ Adnubien Udas cashumbic Iscadiote caid Esusbëd icquid dapuduedshun Satanasën tantiamiac

⁴ Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash.

⁵ Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin.

⁶ Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembali, quequin isted-istedpanëdash Udasën.

Ënquin nidaidëshun Esusën pebanaid

(Mat 26.17-29; Mad 14.12-25; Uan 13.21-30; 1Cod 11.23-26)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash.

⁸ Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacentata —capanëdash Esusën.

⁹ Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun

¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita.

¹² Aden chiac abuc dectatoshon abuc quënëcquid mibi aidëmbi ismendac. Ashunquio penun nacentata —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempandash.

¹⁴ Adashic, inchëshën choash abëd icquidobëd pete sante cuate dayun uequi Esus:

¹⁵ —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi.

¹⁶ Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe queshun obecaded cuesunaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷ Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun.

¹⁸ Tiedën caniquid ënë nidaidëshun padpiden aquenquio iquendambi. Nuquin Papa yacno

choash tabadquidobëdtambi ashunquio aquendambi —quepanëdash Esus.

¹⁹ Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cunesunemenuen isadaidbon menedeniac. Aden cunesuniaidën intac siquec unëso isun, Obeca cunesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esused cuidadac, quequin tantiatequidquio nendac.

²¹ Ëbi chieshënquido ëbi bedmenuequin chuiquid pete sante dayun ëbëdi uec.

²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiash abëd icquido: —¿Midacquidien capec? —quecuededpanëdash.

²⁴ Adashic: —Doseted nuqui iquec. ¿Tsu-dain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash.

25 Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ĕmbi namiaido bëdambo icmequid nebi, quequin muaquin chiec.

26 Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta.

27 Abi pemequid abi nashunquid nec. Adem-bidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi.

28 Ĕbi chieshënquido icnuc ëbi nianesa

29 icsho con Pan ëbi chuiquid icmiacpadquid chuiquid mibitedi icmendambi.

30 Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

Esus ëmbi isacmaid nec, quequin Petedon chiaid (Mat 26.31-35; Mad 14.27-31; Uan 13.36-38)

31 Aden chuishumbic Esusën nadopanëdash: — Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantankuin ëbëd icboedi mibi cuëshëdmetiadquio iquec.

32 Aden mibi Satanasën yuatiadquio iquec, quequin tantiaquin Nuquin Papa naden chiombi.

Simon ëbëd icquidquo iqueque. Yuadnushe queshun Satanasën niac-niacmete chiaid Petedo tantienquo icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon – capanëdash Esusën Petedo chuiquin.

³³ Adoaquien: –Mibi caic, Quënën nauednu, quenuc mibëdi naudedebi. Adecbidi mibi caic, Ünës uanu, quenuc adecbidi mibëdi unës uadebi, Icho –quepanëdash Petedo Esus caic.

³⁴ Adoaquien: –Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi quededquededendac –quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: –Mitsana bedtequid buanenquo yec shictoade buanenquo yec dashcute utsi buanenquo yec quec nidaneta, ëmbi cac nidash ¿mibitedi bunecta tabado? –capanëdash Esusën.

Adoaquien: –Padenquo –quepanëdash abëd icquido.

³⁶ Adoaquien: –Ënden adquid buanenda, queboedi, Ëbi nibëdnuc mitsana bedtequid shictoadtebëdtabi buanta. Chështe bednu, queshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi.

³⁷ Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic.

Aden Nuquin Papan ëbi chuiquin dada uami-ampicpadomboemi nëbimbobi naimbudembi —quepanëdash Esus.

³⁸ Adoquien Esusën chuiboed tantienquio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(Mat 26.36-46; Mad 14.32-42)

³⁹ Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash.

⁴⁰ Adec nidequi abi tabadteniacno choshon Esusën: —Chieshëmëñquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin.

⁴¹ Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash:

⁴² —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin.

⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash.

⁴⁴ Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun:

⁴⁶ —¿Atotsi quiash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash:

⁴⁸ —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec

⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bëdamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, qeshunda utsin-utsinquien

chështe sananubi utsin-utsinquien cueste sananec cho-chopec?

⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash.

⁵⁵ Adec choec umanuc cuëte dëtsiadaid cuëec utsibo tabadacno Petedo cuëte cuëec tsadpanëdash.

⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

⁵⁹ Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoaquien: —Mimbi chiaidbëd icquidpenquo nebi —quepanëdash Petedo. Aden chuinubien cachina bënë cuëdampanëdash.

⁶¹ Adec cuëdanubi aton Icbon bidadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash

⁶² unësqiuo yec umanuc nidash Petedo shubiquiopanëdash.

Esus sondadon mamënshunaid
(*Mat 26.67-68; Mad 14.65*)

⁶³ Adshumbic Esus cuenushe qeshun abi isquidon, sondadon, Esus mamënshumbededquin cuesbededpanëdash.

⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquo icquin ¿midaquidën mibi nëbi cueseque. Tantianu. Chui —capanëdash Esus chuiquin.

⁶⁵ Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid
(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buanshun

⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquo iquendac.

⁶⁸ Adembidi, ¿Mitsipadquidquio Nuquin Papan chomiaid neque? Tantuanu. Èbi chui, cac ëcbedenquio mímibi iquendac.

⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tantiamequin chiec.

⁷⁰ Adoaquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuiti-adquiocquin chuita, cainquio iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

23

Pidato yacno Esus buanaid

(Mat 27.1-2, 11-14; Mad 15.1-5; Uan 18.28-38)

¹ Aden ambibi chiec Esus muc nec, isadaidbo tsusio abentsëc quesho tantiash isadaidbo tsusiobotedi nidtoshon Esus bedshun Pidato yacno buampanëdash.

² Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda

quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoaquien Pidato: —¿Isadaidbo chuiquid dapa ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

⁴ Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiamoaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷ Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec

⁹ Esus chuimenu quec Edodes onquepanëdash. Adoaqui Esusën ëcbedenquio icpanëdash.

¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec.

¹¹ Adoac Edodesbëd sondado Esus icsamboen chuiquin mamënsumbededshumbi chuiquid dapan dashcutebimboecquid abichobicquid Esus dasiuinshun Pidato yacno buameoapanëdash.

¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(Mat 27.15-26; Mad 15.6-15; Uan 18.39-19.16)

¹³ Adashic, isadaidbo tsusiobobëdta isadaidbo utsibo chomeshun

¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëmianquidta nedic? quendabi.

¹⁵ Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec.

¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin:

¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon.

19 Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

20 Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

21 Adnubien: —Cuesten dectame —capanëdash isadaidbon yuec comapenec cuëdcuededquin.

22 Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantuanu. Ma unës uainquioctiadquidi neyoc. Aden tanti-aquin mëyameshun Esus nidmembali —quepanëdash Pidato.

23 Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

24 Adoac iccuededquidon chiacpaden namenuen

25 Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(Mat 27.32-44; Mad 15.21-32; Uan 19.17-27)

26 Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuidtanquin Esus dectante cueste Simon buamiac Esus tsibambëpanëdash.

27 Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash.

28 Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta.

29 Yuecash mëyantequid ushë choendac. Aid ushë chonoc bacuë tishtiapimbocquid caic ut-sibo nadendac: “Bacuëbo nibëdquid icquin min bacuëbo natiasho isenquo mimbi iquec. Adquid yec bëdamboshë mibitedi iquec.”

30 Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiastianqueque. Acte quiusudquid macuësh dapa catashmetabi, Papa, mibi quendac. Adecbidi, Acte quiusudquid macuësh masiametabi, Papa, utsi queoaindac.”

31 Ëbi buansho isec shubiequi, Ëbi mëyantequid ushë choec, quequin tantiesa mibi icpec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquo nëdënquenquo icpec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquo icpec,” queoapecta mibi ique? Ai, quequin tantiatiad —quepanëdash Esus.

32 Adnubien Esusbëdta icsambocquid dada daëd nidmequimbi

33 macuësh mapi canite caid yacno choshombi ëquë daëd dectambudcuentanquin nënantanquo Esus dectampanëdash.

34 Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibique.

Aidon icsamboen nambo yacimboec bēpiscudta, Papa —quepanēdash. Adnubic Esusën dashcute bednuequin sondadon dada uashun tēchun sandoshon cadotanequin dada uatempi puduemebanquin isquin Esusën dashcute bedbampanēdash.

35 Adnubien matses dadpenshun isnubi Isadaidbo tsusiobo isec tabadquin mamēnshumbedec: —¿Utsi-utsien Nuquin Papa yacno yuedanquidta nec? Aidi matses mēnchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanēdash.

36 Adembidi sondadon mamēnshumbedequin paēmboquid mucamboquid sananquin Esus ismequimbi:

37 —Isadaidbo chuiquid dapa iquec unēsenquio iquebi, quiaish nēid bednush bud —capanēdash sondadon.

38 Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanēdash: “Nēid, isadaidbo chuiquid dapa nec,” quequin dada uashun Esusën mapino dectamepanēdash.

39 Adnubien, Esus icsamboen chiec icsambocquid Esusbēdta dectamboed abentsēc: —¿Nuquin Papan chomiaid, Quidistuda ne? Adquid icquin mimbi budmiac ēbi daēdi mibēd budebi —quepanēdash abēd diadquid.

40 Adec Esusbēdta dectamboed abentsēc onquesho tantiash aibdēdta dectamboed utsi: —¿Aidi

unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe?

⁴¹ Icsamboen nabanacsho cuidaid ëbi daëdi nec. Aidi bëdamboquin nabanquid icsho cuidenquioctiadquidi nec –quepanëdash.

⁴² Aden chiashic Esus caic: –Mibi yacno choash chuiquid dapa icquin ëbi bëdamboen tantiaquin nata –quepanëdash Esusbëdta dectamboed utsi.

⁴³ Adoquien: –Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac –quepanëdash Esus abëdta dectamboed abentsëc chiec.

Esus unësaid

(Mat 27.45-56; Mad 15.33-41; Uan 19.28-30)

⁴⁴ Adec onquenubi ushë cuembo yanuc bëtïnacimboec inchëshquio yashic ushë budtsan chënquedoapanëdash.

⁴⁵ Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash.

⁴⁶ Adnubien unësbudec comapenec cuëdec: –Mibi yacno ëbi yuedta, Papa –quiash Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: –Abimbo chïosh. Cuesten dectanaid Esus caid bëdamboquid nïosh. Aidi unësenquioctiadquidi unës uaposh –quepanëdash.

⁴⁸ Ambo tabadquin isquid utsibo Esus unëso isash unësqüio yec aton shubuno nidanepanëdash.

49 Aido nidnubien nidaid Cadidia yacnoësh choshon chidobon Esus tsibanamboedon dad-abëdtambi uano tabadquin isbededpanëdash.

Esus nauedaid

(Mat 27.57-61; Mad 15.42, 47; Uan 19.38-42)

50 Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash.

51 Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash.

52 Aidi Esus unëso isash Esusën dada nauedti-adquio yec Pidato yacno nidshun ambi tantiac-paden Osen chuipanëdash.

53 Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash.

54 Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

55 Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash.

56 Aden isash aton shubuno nidaneshun noadte bëda Esusën dada danoshcanu qeshun

danoshquete chidobon nacnempanëdash.
 Nacnenash inchëshbudtsëqui seis icnuc Nuquin
 Papan chiacpadec chonoadtemaid ushë
 nec, quiash Esus nauedacno nidenquio yec
 tabadpanëdash. Nuquin Papan chiacpadec
 tabadpanëdash.

24

Esus uincuenta

(Mat 28.1-10; Mad 16.1-8; Uan 20.1-10)

¹ Adashic, sabado inchëshbudtsëqui seis yanuc
 chonoadtemaid ushë naimëdan badiadnuc
 danoshcanun ambi nacnemboed buanec Esus
 nauedbocno isec chidobo nidpanëdash.

² Ambo choshon Esus nauedshun bëtashaid
 cuënote shëcniacsho isashi

³ shëcuën puduedash aton Icho Esusën dada
 nibëdsho isec tabadpanëdash.

⁴ Adec tabadnubien dada daëd dashcute
 dasiuidacimboec dasiuidash chënquec
 chopanëdash.

⁵ Aid isash dacuëdcuededequi isenquio yec chi-
 dobo tabadpanëdash. Adsho isash dada daëd:
 —¿Atotsi canuen unësacsho nauedac uincuemiaid
 nibëne?

⁶ Nëmbo nauedboedi nibëdec. Aidi uincue-
 naccosh. ¿Aidi Cadidia yacno mibëdi tabadquin
 chuisho tantienquioda icco?

⁷ Naden Esusën mibitedi chiondash: “Matse-
 said ëbi icsho bedshun icsambocquid ëbi menen-
 dac. Aden meniac cuesten dectanac daëdec ush-
 tanec uincuenoaiibi,” quequin Esusën chiondash
 —quepanëdash dada daëd chidobo caic.

⁸ Aden chiac chidobon Esusën chiaid abi bēpiscudaid padpiden tantiapanēdash.

⁹ Aden tantiash Esus nauedaid shēcuē yacnoēsh puduenanec Esus tantiaquid dadpen tabadacno choec puduedshun ambi isboedbēdtabi ambi tantiaboed chidobon chuibampanēdash.

¹⁰ Madia shubu dadpen icquid Mactada caid yacnoshon tishaid yec Uana yec Madia utsi Uambēdtan Acobon tita yec chido utsibo yec quec choshon Esusën Ēbi chuibeneta caido chuipanēdash.

¹¹ Aden chuisho tantiash: –Mimbi chiaid tantiatiapimbo iquebi –quecuededpanēdash iccuededquido.

¹² Adnubien Petedo nidtoanec titinquec nauedaid shēcuē yacno choash shuebudquin shēcuē anisquin dataniaid dashcuteuidi uesho ispanēdash. Aden isanec nidequi: –¿Atodain nechitec? –quepanēdash Petedo tantienquo yec.

Emaus yacmi nidte
(Mad 16.12-13)

¹³ Adashic abi ushēmbi Edusaden yacnoēsh utsi-bobēd iccuededboed dada daēd shubu daēdpactsēc icquid Emaus caid yacno nidpanēdash.

¹⁴ Adec nidequi ambi Edusaden yacnoshon isboedbēdta ambi tantiaboed chiec onquepanēdash.

¹⁵ Aden chiec onquec nidshobi Esusën aid daēdi chinunash aidobēd nidpanēdash.

¹⁶ Aden abi chinuntuidsho isac utsibimboec Esus isadpanēdash.

17 Adec nidequi Esus: —¿Atotsi chuibanec on-quec nide? —quepanëdash. Adsho tantiash unësquio yec mamënenquio yec nidtuidpanëdash.

18 Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

19 Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiai icquin ambi chuibanaiid ambi nabanaidbidi Nuquin Papabëdtan matses dadpen-shun bëdamboen isaid icposh.

20 Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh.

21 Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Ëmbi caboedi unës uaposh. Aidi unës uan daëdec ushobi.

22 Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac

23 nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh.

24 Aden chidobon chuisho tantienquio yec ëbëd icquido Esusën dada nauedbocono nidshun chi-

dobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc.

²⁶ ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus.

²⁷ Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

²⁸ Aden chuibanequi shubu daëdpactsëc icquid Emaus caid yacno anoentsëqui choshon datan-shobimboecnuc Esus isun:

²⁹ —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash.

³¹ Aden nasho isun badedi, Esus nec, quequin tantianubi Esus nibëdquio yampanëdash.

³² Adsho isash: —¿Podquedën choquin Nuquin Papan chiaid dada uampid chuisho tantias, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi Emaus yacno choaed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash:

34 —Abimbo iquec. Nuquin Icho uincuempac-cosh. Uincuenanec choquin aidëmbi Simon isme-tuidposh —quepanëdash iccuededquido.

35 Aden iccuededquidon chuisho tantiasun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

36 Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

37 Adec aid chosho isash: Podo bitsi nec, quec dacuëdequi abëd icquido tabadpanëdash.

38 Adsho isashien Esus: —¿Atotsi quiash, ¿Esusida nepec? mibitedi quepe?

39 Con mëdantebëdta con taë is. Èbibi nebique. ¿Mëtoccaïd taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

40 Aden chuitanquin abi bëchun shuin mëtoccaïd chiuë aton mëdantebëdta aton taë Esusën ismepanëdash.

41 Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien

42 nuëcquid shëaid cuëshë menepanëdash.

43 Aden meniac bedshun Esusën pepanëdash abëd icquidon isnubi.

⁴⁴ Aden piash: –Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi –quepanëdash abëd icquido tantiamenuc.

⁴⁵ Aden chuishumbic abëd icquido tantiamenuc:

⁴⁶ –Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac.

⁴⁷ Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac.

⁴⁸ Mëyanquin unës uaqui ëbi uincuenacsho mibitedishun ispoc.

⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” –capanëdash Esusën.

*Esus abuc indote
(Mad 16.19-20)*

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante

abuc sananquin ismec: —Nëidtedi bëdamboen ista, Papa —quepanëdash Esus.

⁵¹ Aden chiacsho abëd capucuenequido niamequin Esus aton Papan abuc indopanëdash.

⁵² Aden indosho isash, Ëbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash.

⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nited-nitedquin Nuquin Papan naid chuidenepanëdash.

Padi. Aited dada uaombi, Teyopido.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

446da786-5bd1-5ffa-85e2-9eff4052cf8b